

宋文鑑

和/6  
339  
6



宋文鑑卷第二十六

詩

五言絕句

松江夜泊

孤鴈

江上漁者

淮上遇風

出守桐廬道中十首

無絃琴

遠山

夏雨小亭有懷

寒草

芳草

送望之赴臨江

所錢與  
有拘邦

鮑當

鮑當

范仲淹

范仲淹

范仲淹

王琪

歐陽修

梅堯臣

梅堯臣

王安石

王安石

利  
292  
6

宋文鑑

宋文鑑卷第二十六

溝港

王安石

梅花

王安石

歲寒

邵雍

廬山三首

蘇軾

蝸牛

蘇軾

讀史

蘇轍

遣老齋三首

蘇轍

陪謝師厚遊范文正公祠十絕

黃庭堅

謫居黔南五首

黃庭堅

蠶婦

張俞

秦王纜船石

楊蟠

紈扇

張舜民

鴈

陳師道

春日

崔鶻

題績溪雪峯樓

崔鶻

歲暮書堂

汪革

長安在何許二首

賀鑄

六言

題舒州山谷寺石牛洞

王安石

題西太一宮

王安石

四賢吟

邵雍

獨坐

文同

相如

文同

鷺鷥

文同

題鄭防畫夾三首

黃庭堅

蟻蝶圖

黃庭堅

有惠江南帳中香者戲作

黃庭堅

子瞻繼和復答

黃庭堅

和高子勉

登山望海

盩浦書事

松江夜泊

舟閑人已息林際月微明一片清江水中涵萬古情

孤鴈

寒多稻糧少萬里孤難進不惜充君庖為帶邊庭信

江上漁者

江上往來人但愛鱸魚美君看一葉舟出沒風波裏

淮上遇風

一棹危於葉傍觀亦損神他時在平地無忽險中人

出守桐廬道中十首

隴上帶經人金門齒諫臣雷霆日有犯始可報吾親

君恩泰山重爾命鴻毛輕一意懼千古敢懷妻子榮

黃庭堅

張耒

秦觀

鮑當

鮑當

鮑當

范仲淹

范仲淹

范仲淹

范仲淹

范仲淹

范仲淹

妻子屢牽衣出門投禍機寧知白日照猶得虎符歸

分符江外去人笑似騷人不道鱸魚美還堪養病身

有病甘長廢無機苦直言江山藏拙好何敢望天閭

天閭變化地所好必真龍軻意正迂闊悠然輕萬鍾

萬鍾誰不慕意氣滿堂金必若枉此道傷哉非素心

素心愛雲水此日東南行笑解塵纓處滄浪無限清

滄浪清可愛白鳥鑑中飛不信有京洛風塵化客衣

風塵日以遠郡枕子陵溪始見神龜樂優優尾在泥

無絃琴

寂寞之清音其為樂至深應嫌鼓腹者獨是撫絃琴

遠山

山色無遠近看山終日行峯巒隨處改行客不知名

夏夜小亭有懷

西南雨氣濃林上昏月色寒影不隨人寥寥空露白

歐陽修

梅堯臣

梅堯臣

梅堯臣

梅堯臣

寒草

梅堯臣

寒草纔變枯陳根已合綠始知天地仁誰道風霜酷

芳草

王安石

芳草知誰種緣階已數叢無心與時競何苦綠蔥蔥

送望之赴臨江

王安石

黃雀有頭顱長行萬里餘想因居出守暫得免包苴

溝港

王安石

溝港重重柳山坡處處梅小輿穿麥過狹徑礙桑回

梅花

王安石

牆角數枝梅凌寒獨自開遙知不是雪為有暗香來

歲寒

邵雍

松柏入冬殘方能見歲寒聲須風裏聽色更雪中看

廬山三首

蘇軾

青山若無素偃蹇不相親要識廬山面他年是故人

自昔懷清賞神游杳靄閒如今不是夢真个是廬山  
芒鞋青竹杖自掛百錢游頗怪深山裏人人識故侯

蝸牛

蘇軾

腥涎不滿殼聊足以自濡升高不知回竟作黏壁枯

讀史

蘇轍

江河浪如屋要須滄海容可憐狄仁傑猶復負婁公

遺老齋三首

蘇轍

久無叩門聲啄啄問何故田中有人至昨夜盈尺雨  
避事已謝客養性不看書書中多感遇掩卷輒長吁  
人言里中舊獨有陳太邱文若命世人惜哉憂人憂

陪謝師厚游百花洲槃礴范文正公祠下道羊曇哭謝安  
事因讀生存華屋處零落歸山邱為韻

黃庭堅

憶在昭陵日傾心用老成功歸仁祖廟政得一書生

羊生但著鞭勿哭西州門故有不亡者南山相與存  
慶州自不惡籍甚載聲華忠義可無憾公今有世家  
公歸未百年鶴巢荒古屋我吟殄瘁詩悲風韻高木  
傷心祠下宇在時公燕處臨水不相猜江鷗會人語  
公有一盃酒與人同醉醒遺民能記憶欲語涕飄零  
委徑問謠俗高邱省個作昔遊非苟然今夜幾開落  
在昔實方柄成公見圓機九原尚友心白首要同歸  
人去洲渚在春回花草斑清談值淵對發興如江山  
落日銜城壁祠東更一遊悲來惜酒少安得董糟邱

謫居黔南五首

黃庭堅

相望六千里天地隔江山十書九不到何用一開顏  
霜降水反壑風落木歸山冉冉歲華晚昆蟲皆閉關  
冷淡病心情暄和好時節故園音信斷遠郡親賓絕  
山郭燈火稀峻天星漢少年光東流水生計南枝鳥

冥性齊遠近委順隨南北歸去誠可憐天涯住亦得

蠶婦

張俞

昨日到城郭歸來淚滿巾遍身羅綺者非是養蠶人

秦王纜船石

楊蟠

色陰長帶雨疑是白雲根欲問東巡事今猶不敢言

紈扇

張舜民

紈扇本招風會將熱時用秋來掛壁上卻被風吹動

鴈

陳師道

來往違寒暑飛鳴在稻梁未知溟海大不肯過衡陽

春日

崔鷗

落日不可盡丹林紫谷開明明遠色裏歷歷暝鴉回

題績溪雪峯樓

崔鷗

題詩最高處不爲付人看記著今朝勝山明松雪寒

歲暮書堂

汪革

霜重堆鋪紈風凜肌生粟心莊耳目清思慮無由俗

長安在何許二首

賀鑄

長安在何許疑在青天上矯首遡西風浮雲斷人望

長安在何許疑在白日下裴徊天一隅華月生新夜

六言

題舒州山谷寺石牛洞

王安石

水泔泔而北出山靡靡而旁圍欲窮源而不得竟悵望以空歸

題西太一宮

王安石

柳葉鳴蜩綠暗荷花落日紅酣三十六陂煙水白頭想見江南

四賢吟

邵雍

彥國之言鋪陳晦叔之言簡當君實之言優游伯淳之言條暢四

賢洛陽之望是以在人之上有宋熙寧之間大為一時之壯

獨坐

文同

不報門前賓客已收案上文書獨坐水邊林下宛如故里閑居

相如

文同

相如何必稱病靖節奚須去官就下其誰不許如愚是處皆安

鷺鷥

文同

避雨竹間點點迎風柳下翻翻靜依寒蓼如畫獨立晴沙可憐

題鄭防畫夾三首

黃庭堅

子母猿啼榭葉山南北危機世故誰能構里設中皆是由基

惠崇煙雨歸鴈坐我瀟湘洞庭欲喚扁舟歸去故人言是丹青

折葦枯荷共晚紅榴苦竹同時睡鴨不知飄雪寒雀四顧風枝

蟻蝶圖

黃庭堅

胡蝶雙飛得意偶然畢命網羅羣蟻爭收墜翼策勳歸去南柯

有惠江南帳中香者戲作

黃庭堅

螺甲割崑崙耳香材屑鷓鴣班欲雨鳴鳩日永下帷睡鴨春閑

子瞻繼和復答

黃庭堅

迎燕温風旖旎潤花小雨班班一炷煙香得意九衢塵裏偷閑

和高子勉

黃庭堅

句法俊逸清新詞源廣大精神建安數六七子開元纔兩三人

登山望海

張耒

鳥去蒼煙古木人歸綠野孤舟信美雖非吾土消憂且復登樓

寧浦書事

秦觀

揮汗讀書不己人皆怪我何求我豈更求聞達日長聊以銷憂

宋文鑑卷第二十六

宋文鑑卷第二十七

詩

七言絕句

新蟬

寇準

書河上亭壁

寇準

離京日作

寇準

寄傳逸人

張詠

赴闕日過申州經石子鎮驛

鄭文寶

菊

韓丕

題河陽後城平嵩閣

李迪

水亭秋日偶書

林逋

自作壽堂因作一絕誌之

林逋

上王相公

魏野

天華寺

呂夷簡



漁者

郭震

老卒

郭震

雲

郭震

觀藏珠

夏竦

睢陽

夏竦

松江

陳堯佐

華清宮

陳堯佐

酬阮逸詩卷

鮑當

行色

司馬池

雪中

晏殊

讀史

謝濤

秋夕北樓

石延年

題龍興寺老柏院

張在

答永叔問客

王琪

端午帖子詞二首

歐陽修

溫成皇后閣春帖子詞

歐陽修

樵者

歐陽修

謝判官幽谷種花

歐陽修

對雪憶往歲錢塘西湖訪林逋三首

梅堯臣

淮中晚泊犢頭

蘇舜欽

暑中閑詠

蘇舜欽

夏意

蘇舜欽

蠟燭

孫復

書汜水關寺壁

王安石

漢武

王安石

張良

王安石

曹參

王安石

諸葛武侯

王安石

讀唐書	懷張唐公	南浦	初夏卽事	光宅寺	悟真院	示公佐	邵平	讀漢書	臺城寺側獨行	雜詠	揚子	范增	杏花
王安石	王安石	王安石	王安石	王安石	王安石	王安石	王安石	王安石	王安石	王安石	王安石	王安石	王安石

韓子	省中	溝西	歸庵	封舒國公	北山	壬戌正月晦復至齊安	書何氏宅壁	金陵卽事三首	定林	孟子	孔光	醉醪	穎國龐公挽詞
王安石	王安石	王安石	王安石	王安石	王安石	王安石	王安石	王安石	王安石	王安石	李泰伯	韓維	李師中

負暄閑眠

仲訥

夜深吟

王令

登樓三首

狄遵度

讀司馬君實撰呂獻可墓誌

鄭獬

途次葉縣觀千葉桃花

陶弼

登湖月亭

陶弼

對花有感

寇準

新蟬

寇準

寂寂宮槐雨乍晴高枝微帶夕陽明臨風忽起悲秋思獨聽新蟬

第一聲

書河上亭壁

寇準

暮天寥落凍雲垂一望危亭欲下遲臨水數村誰畫得淺山寒雪

未銷時

離京日作

寇準

致君才業本無能戀闕情懷老不勝徹過龍津重回首瞳矐初日上觚稜

寄傳逸人

張詠

當年失腳下漁磯苦戀明朝未得歸寄語巢由莫相笑此心不是愛輕肥

赴闕日過申州經石子鎮驛

鄭文寶

得罪先朝出粉闈五原功業有誰知年深放逐無人識白雪關頭一望時

菊

韓丕

造化功夫豈異端自緣開晚少人看若教總似陶潛眼肯向芳春賞牡丹

題河陽後城平嵩閣

李迪

南指嵩高北太行大河中出貫靈長君王不恃金湯險自有仁恩結萬方

水亭秋日偶書

林逋

巾子峯頭烏臼樹微霜未落已先紅  
凭欄高看復下看半在石池波影中

自作壽堂因作一絕誌之

林逋

湖外青山對結廬墳前修竹亦蕭疎  
茂陵它日求遺藁猶喜曾無封禪書

上王相公

魏野

聖朝宰相年年出君在中書十四秋  
西祀東封俱已畢好來相伴赤松遊

天華寺

呂夷簡

賀家湖上天華寺一一軒窗向水開  
不用閉門防俗客愛閑能有幾人來

漁者

郭震

江柳弄風顰翠黛山花着雨濕燕脂  
卻收短棹拈長笛一葉舟中

仰面吹

老卒

郭震

老來弓劍喜離身說着沙場更愴神  
任使將軍全得勝歸時須少去時人

雲

郭震

聚散虛空去復還野人閑處倚筇看  
不知身是無根物蔽月遮星作萬端

觀藏珠

夏竦

斂手機心頗自安遮藏有路巧千般  
主公當面無因見只怕傍人冷眼看

睢陽

夏竦

海鴈橋邊春水深略無塵土到花陰  
亡機不管人知否自有沙鷗信此心

松江

陳堯佐

平波渺渺煙蒼蒼菰蒲纔熟楊柳黃扁舟繫岸不忍去秋風斜日  
鱸魚鄉

華清宮

陳堯佐

百首新詩百意精不尤妃子不尤兵爭爲一向傷前事都爲明皇  
恃太平

酬阮逸詩卷

鮑當

木有毫端水有源漸成盤錯始潺湲右丞畫筆多平淺平淺應知  
近自然

行色

司馬池

冷於陂水淡於秋遠陌初窮見渡頭賴得丹青無畫處畫成應遣  
一生愁

雪中

晏殊

平臺千里渴商霖內史憂民望最深衣上六花非所好畝間盈尺  
是吾心

讀史

謝濤

百年奇特幾張紙千古英雄一窖塵惟有炳然周孔教至今仁義  
浸生民

秋夕北樓

石延年

秋露露華清帶水月明天色白連河夜闌澄景生微動瑟瑟層颼  
上下波

題龍興寺老柏院

張在

南鄰北舍牡丹開年少尋芳去又迴唯有君家老柏樹春風恰似  
不曾來

答永叔問客

王琪

班班疎雨寒無定皎皎圓蟾望欲闌應在浮雲儘深處更憑絲竹  
一催看

端午帖子詞二首

歐陽修

楚國因讒逐屈原終身無復入君門願因角黍詢遺俗可鑒前王

惑巧言

嘉辰共喜沐蘭湯毒疹何須採艾禳但得皋夔調鼎鼎自然災祲變休祥

温成皇后閣春帖子詞

歐陽修

內助從來上所嘉新春不忍見新花君王念舊憐遺族長使無權保厥家

樵者

歐陽修

雲際依依認舊林斷崖荒磴路難尋西山望見朝來雨南澗歸時渡處深

謝判官幽谷種花

歐陽修

淺深紅白宜相間先後仍須次第栽我欲四時携酒去莫教一日不花開

對雪憶往歲錢塘西湖訪林逋三首

梅堯臣

昔乘野艇向湖上泊岸去尋高士初折竹壓蘿會礙過卻穿松下

到茅廬

旋燒枯栗衣猶濕去愛峯前有徑開日暮更寒歸欲懶無端撩亂入船來

樵童野犬迎人後山葛棠梨案酒時不畏尖風吹入牖更教牀畔覓鴟夷

淮中晚泊犢頭

蘇舜欽

春陰垂野草青青時有幽花一樹明晚泊孤舟古祠下滿川風雨看潮生

暑中閑詠

蘇舜欽

嘉果浮沉酒半醺牀頭書冊亂紛紛北軒涼吹開疎竹卧看青天行白雲

夏意

蘇舜欽

別院深深夏簟清石榴開遍透簾明樹陰滿地日卓午夢覺流鶯時一聲

蠟燭

孫復

六龍西走入崦嵫寂寂華堂漏轉時一寸丹心如見用便為灰燼亦無辭

書汜水關寺壁

王安石

汜水鴻溝楚漢間跳兵走馬百重山如何咫尺商於地便有園公綺季閑

漢武

王安石

壯士悲歌出塞頻中原蕭瑟半無人君王不負長陵約直欲功成賞漢臣

張良

王安石

漢業存亡俯仰中留侯於此每從容固陵始議韓彭地複道方圖雍齒封

曹參

王安石

東髮河山百戰攻白頭富貴亦成功華堂不著新歌舞卻要區區

一老翁

諸葛武侯

王安石

慟哭揚顛為一言餘風今日更誰傳區區庸蜀支吳魏不是虛心豈得賢

讀唐書

王安石

志士無時亦少成中才隨世就功名并汾諸子何為者坐與文皇立太平

懷張唐公

王安石

直諒多為世所排有懷長向我前開幕年惆悵誰知此南陌東阡獨往來

南浦

王安石

南浦東崗二月時物華撩我有新詩含風鴨綠粼粼起弄日鵝黃裊裊垂

初夏卽事

王安石

石梁茅屋有彎碕流水濺濺度雨陂晴日暖風生麥氣綠陰芳草  
勝花時

光宅寺

梁武帝宅也其北齊安隔淮齊武帝宅宋興又在其北

王安石

齊安孤起宋興前光宅相仍一水邊蜂紛蟻爭今不見故窠遺堦  
尚依然

悟真院

王安石

野水縱橫漱屋除午牕殘夢鳥相呼春風日日吹香草山北山南  
路欲無

示公佐

王安石

殘生傷性老耽書年少東來復起予各據槁梧同不寐偶然聞雨  
落階除

邵平

王安石

天下紛紛未一家販緇屠狗尚雄誇東陵豈是無能者獨傍東門  
手種瓜

讀漢書

王安石

京房劉向各稱忠詔獄當時跡自窮畢竟論心異恭顯不妨迷國  
略相同

臺城寺側獨行

王安石

春山撩亂水縱橫離落荒畦草自生獨往獨來山下路筍輿看得  
綠陰成

雜詠

王安石

烏石崗頭躑躅紅東江柳色漲春風物華人意會相值永日留連  
草莽中

揚子

王安石

儒者陵夷此道窮千秋止有一揚雄當時薦口終虛語賦擬相如  
卻未工

范增

王安石

鄭人七十漫多奇為漢毆民了不知誰合軍中稱亞父直須推讓



外黃兒

杏花

王安石

垂楊一逕紫苔封人語蕭蕭院落中獨有杏花如喚客倚牆斜日  
數枝紅

韓子

王安石

紛紛易盡百年身舉世何人識道真力去陳言誇末俗可憐無補  
費精神

省中

王安石

萬事悠悠心自知強顏於世轉參差移床獨卧秋風裏靜看蜘蛛  
結網絲

溝西

王安石

溝西直下看芙蓉葉底三三兩兩魚若比濠梁應更樂近人渾不  
畏春鉏

歸庵

王安石

稻畦藏水綠秧齊松鬣初乾尚有泥縱蹇尋岡歸獨卧東庵殘夢  
午時雞

封舒國公

王安石

桐鄉山遠復川長紫翠連城碧滿隍今日桐鄉誰愛我當時我自  
愛桐鄉

北山

王安石

北山輪綠漲橫陂直塹回塘灩灩時細數落花因坐久緩尋芳草  
得歸遲

壬戌正月晦復至齊安

王安石

風暖柴荆處處開雪乾沙靜水洄洄意行卻得前年路看盡梅花  
看竹來

書何氏宅壁

王安石

有興提魚就公賚此言雖在已三年皖瀆終負幽人約空對湖山  
坐惘然

金陵卽事三首

王安石

水際柴門一半開  
小橋分路入青苔  
背人照影無窮柳  
隔屋吹香併是梅  
結綺臨春歌舞地  
荒蹊狹巷兩三家  
東風漫漫吹桃李  
非復當時林外花  
昏黑投林曉更驚  
背人相喚百般鳴  
柴門長閉春風暖  
事外還能見鳥情

定林

王安石

定林青木老參天  
橫貫東南一道泉  
六月杖藜尋石路  
午陰多處弄潺湲

孟子

王安石

沉魄浮魂不可招  
遺編一讀想風標  
何妨舉世嫌迂闊  
故有斯人慰寂寥

孔光

李泰伯

王莽欲為光與草  
董賢將過自迎門  
省中樹木何閑事  
卻對妻孥不肯言

醉醺

韓維

平生為愛此香濃  
仰面常迎落架風  
每至春歸有遺恨  
典刑猶在酒盃中

穎國龐公挽詞

李師中

獨立無朋但任真  
不持聲勢掩君親  
若將坤體論臣道  
公是朝廷第一人

負暄閑眠

仲訥

茅簷晴日暖於春  
一枕鈞天樂事新  
滿眼繁花皆得意  
午眠安穩卻無人

夜深吟

王令

叩几悲歌涕滿襟  
聖賢千古我如今  
凍琴絃斷燈青暈  
誰會男兒半夜心

登樓三首

狄遵度

道之不好乘桴浮赴河蹈海成今游春歸應到嶺北樹日出先照  
天南樓  
羣山南走失所往百川東逝茲其窮天低水國疑將壓人過月塘  
愁欲空  
莎青石細淺見底天空雲淡無一毫波間圓月照不動海上清風  
來最高

讀司馬君實撰呂獻可墓誌

鄭獬

一讀斯文淚寫襟磨天直氣萬千尋知君不獨悲忠義又有兼憂  
天下心

途次葉縣觀千葉桃花

陶弼

三月官桃滿上林一花千葉費春心葉公城外襄河北一樹無人  
色更深

登潮月亭

陶弼

渡頭人語知潮上下看南江東北流試引輕帆學歸去茶山溪淺  
卻回舟

對花有感

陶弼

得莫欣欣失莫悲古今人事若花枝桃紅李白薔薇紫問著春風  
自不知

宋文鑑卷第二十七

宋文鑑卷第二十八

詩

七言絕句

天人

禁煙留題錦幘山下

懶起

送蘇修撰赴闕四首

別館中諸公

聖心

老大

有喪

土牀

芭蕉

貝母

張張張張張張張邵邵邵  
載載載載載載載雍雍雍

題解詩後

怪石

白雲庵

偶成

送呂晦叔赴河陽

贈司馬君實

題館壁

山堂偶書

冬至日遊吉祥寺

唐道人言天目山

陳季常所蓄朱陳村嫁娶圖

春日

贈劉景文

望湖樓醉書一首

蘇軾詩集卷二十八

張

黃

黃

程

程

劉

唐

蘇

蘇

蘇

蘇

蘇

蘇

蘇

載

庶

庶

顯

顯

放

詢

軾

軾

軾

軾

軾

軾

軾

望海樓晚景二首

書雙竹湛師房

王莽

金橙徑

霜筠亭

中秋月

梅花二首

南堂

書李世南所畫秋景

題澄邁驛通潮閣

歸計

姑熟

靜居

虞姬墓

蘇軾詩集卷二十八

二

蘇

蘇

蘇

蘇

蘇

蘇

蘇

蘇

蘇

蘇

沈

沈

李

蘇

軾

軾

軾

軾

軾

軾

軾

軾

軾

括

括

易

轍

轍

秋祀高禩

蘇轍

題陽關圖

黃庭堅

題李伯時畫巖子陵釣灘

黃庭堅

北牕

黃庭堅

和謝公定河朔漫成

黃庭堅

梅福隱居

黃庭堅

次韻子瞻延英入侍

黃庭堅

戲題小雀捕飛蟲畫扇

黃庭堅

竹枝歌二首

黃庭堅

答聞善二首

黃庭堅

病起荆江亭即事

黃庭堅

臺下

沈遼

宿濟州西門外旅館

晁端友

召試學士院

王欽臣

題淺沙泉

黃履

次韻答學者

陳師道

寄都下故人示王子安

陳師道

絕句

陳師道

贈吳氏兄弟

陳師道

絕句

陳師道

經筵大雪不罷講二首

呂希哲

會點

呂希哲

題宣州後堂壁

張耒

桓武公

張耒

絕句

張耒

漫成

張耒

北郊

呂大臨

送劉戶曹

呂大臨

題驛舍

盧秉

送呂子進

張舉

守關

劉季孫

題李世南畫扇

蔡肇

白歎

任伯雨

感古二首

任伯雨

途中

張公庠

張辟疆

劉歧

春日村居

崔鷗

讀漢書

鮑欽止

垂虹亭

米芾

題泗濱南山石壁曰第一山

米芾

杜牧

田畫

墨子

田畫

見降羌感事

晁詠之

暮雨

謝邁

雨中漫成

謝邁

村老

馬存

自齊山借舟泛湖還家

曹緯

茅塘馬上

賀鑄

天人

邵雍

義軒堯舜雖難復湯武桓文尚可循事既不同時又異也由天道也由人

禁煙留題錦岬山下

邵雍

春半花開百萬般東風近日惡摧殘可憐桃李性溫厚吹盡都無一句言

懶起

邵雍

半記不記夢覺後似愁無愁情倦時擁衾側臥未忺起簾外落花

撩亂飛

送蘇修撰赴闕四首

張載

秦弊于今未息肩高蕭從此法相沿生無定業田疆壞赤子存亡

任自然道大寧容小不同顛愚何敢與機通并疆師律三王事請議成功

器業中闔闢天機未始休衫衣舐足兩何求巍巍只為蒼生事彼美何嘗

與九州出異歸同禹與顏未分黃閣與青山事機爽忽秋毫上聊驗天心

語默閒別館中諸公

張載

九天宮殿鬱嵒堯碧瓦參差逼絳霄藜藿野心雖萬里不無忠戀

向清朝

張載

聖心難用淺心求聖學須專禮法修千五百年無孔子盡因通變

老優游

張載

老大心思久退消倒巾終日面峇堯六年無限詩書樂一種難忘

是本朝

張載

有喪不免道終非少為親嫌老為衰舉世只知隆考妣切思不見

我心悲

張載

土牀煙足紬衾暖瓦釜泉乾豆粥新萬事不思温飽外漫然清世

一閑人

張載

芭蕉心盡展新枝新卷新心暗已隨願學新心養新德旋隨新葉



貝母

張載

貝母階前蔓百尋雙桐盤遶葉森森剛強顧我蹉跎甚時欲低柔

警寸心

張載

置心平易始通詩逆志從容自解頤文害可嗟高叟固十年聊用

勉經師

黃庶

山鬼水怪着薜荔天祿辟邪眠莓苔鉤簾坐對心語口曾見漢唐

池館來

黃庶

白雲無種滿地生有時出山為雨露老僧惆悵望雲歸盡日庵前

自來去

程顥

雲淡風輕近午天望花隨柳過前川旁人不識予心樂將謂偷閑

學少年

送呂晦叔赴河陽

程顥

曉日都門颭旆旌晚風鏡吹入三城知公再為蒼生起不是尋常

刺史行

程顥

二龍閑臥洛波清今日都門獨餞行願得賢人均出處始知深意

在蒼生

劉放

璧門金闕倚天開五見宮花落古槐明日扁舟江海去卻從雲氣

望蓬萊

唐詢

在處煙雲早晚生自疑呼吸氣皆靈十年夢寐江山裏今見江山

入戶庭

蘇軾

井底微陽回未回蕭蕭寒雨溼孤菱何人更似蘇夫子不是花時肯獨來

唐道人言天目山上俯視雷雨每大電但聞雲中如嬰兒聲殊不聞雷震也

已外浮名更外身區區雷電若為神山頭只作嬰兒看無限人間失箸人

陳季常所蓄朱陳村嫁娶圖二首 蘇軾

何年顧陸丹青手畫作朱陳嫁娶圖聞道一村唯兩姓不將門戶買崔盧

我是朱陳舊使君勸耕曾入杏花村而今風物那堪畫縣吏催錢夜打門 朱陳村在徐州蕭縣

春日 蘇軾

鳴鳩乳燕寂無聲日射西牕潑眼明午睡醒來無一事只將春睡賞春晴

贈劉景文

蘇軾

荷盡已無擎雨蓋菊殘猶有傲霜枝一年好景君須記最是橙黃橘綠時

望湖樓醉書二首

蘇軾

黑雲翻墨未遮山白雨跳珠亂入船卷地風來忽吹散望湖樓下水如天

放生魚鱉逐人來無主荷花到處開水枕能令山俯仰風船解與月徘徊

望海樓晚景二首

蘇軾

橫風吹雨入樓斜壯觀應須好句誇雨過潮平江海碧電光時掣紫金蛇

青山斷斷塔層層隔岸人家喚欲磨江上秋風晚來急為傳鍾鼓到西興

書雙竹湛師房

蘇軾

暮鼓朝鍾自擊撞閉門孤枕對殘釭白灰旋撥通紅火臥聽蕭蕭雪打窗

王莽

蘇軾

漢家殊未識經綸入手功名事事新百尺穿成連夜井千金購得解飛人

金橙徑

蘇軾

金橙縱復里人知不見鱸魚價自低須是松江煙雨裏小船燒碓擣香齏

霜筠亭

蘇軾

解籜新篁不自持嬋娟已有歲寒姿要看凜凜霜前意須待秋風粉落時

中秋月

蘇軾

暮雲收盡溢清寒銀漢無聲轉玉盤此生此夜不長好明月明年何處看

梅花二首

蘇軾

春來幽谷水潺潺的皦梅花草棘間一夜東風吹石裂半隨飛雪渡關山

何人把酒慰深幽開自無聊落更愁幸有清溪三百曲不辭相送到黃州

南堂

蘇軾

掃地燒香閉閣眠簟紋如水帳如煙客來夢覺知何處掛起西牕浪接天

書李世南所畫秋景

蘇軾

人閒斤斧日創痍誰見龍蛇百尺姿不是溪山曾獨往何人解作掛猿枝

題澄邁驛通潮閣

蘇軾

餘生欲老海南村帝遣巫陽招我魂杳杳天低鵲沒處青山一髮是中原

歸計

沈括

住山人少說山多空只年年憶薜蘿不是自心應不信眼前歸計又蹉跎

姑熟

沈括

新晴渡口百花香石子池頭鴨弄黃捲幔夕陽留不住好風將雨過梅塘

靜居

李宗易

大都心足身還足祗恐身閑心未閑但得心閑隨處樂不須朝市與雲山

虞姬墓

蘇轍

布叛增亡國已空摧殘羽翮自合窮艱難獨與虞姬共誰使西來敵沛公

秋祀高禩

蘇轍

乾德年中初一新頽垣破瓦委荆榛興亡舉墜干戈際閒暇方知

國有人

題陽關圖

黃庭堅

斷腸聲裏無形影畫出無聲亦斷腸想得陽關更西路北風低草見牛羊

題李伯時畫嚴子陵釣灘

黃庭堅

平生久要劉文叔不肯為渠作上公能令漢家重九鼎桐江波上一絲風

北牕

黃庭堅

生物趨功日夜流園林才夏麥先秋綠陰黃鳥北牕簟付與來禽安石榴

和謝公定河朔漫成

黃庭堅

漢時水占十萬頃官寺民居皆濁河豈必九渠忘故道直緣穿鑿用工多

梅福隱居

黃庭堅

吳門不作南昌尉上疏歸來朝市空笑拂巖花問塵世故人子是  
國師公

次韻子瞻延英入侍

黃庭堅

延和西路古槐陰不隔朝宗夙夜心公有胃中五色線平生補衮  
用功深

戲題小雀捕飛蟲畫扇

黃庭堅

小蟲心在一啄閒得失與世同輕重丹青妙處不可傳輪扁斲輪  
如此用

竹枝歌二首

黃庭堅

竹竿披面蛇倒退摩圍山要胡孫愁杜鵑無血可續淚何日金雞  
赦九州  
命輕人鮮囊頭船日瘦鬼門關外天北人墮淚南人笑青壁無雞  
聞杜鵑

答聞善二首

黃庭堅

公擇醉面桃花紅人百忤之無愠容莘老夜闌傾數斗焚香默坐  
日生東

陶令舍中有名酒無夕不為父老傾四坐歡欣觀酒德一燈明暗  
又詩成

病起荆江亭即事

黃庭堅

成王小心似文武周召何妨略不同不須要出我門下實用人材  
即至公

臺下

沈遼

石梅落落欲黃時細雨濛濛暗不開數日不行臺下路不知江水  
過山來

宿濟州西門外旅館

晁端友

寒林殘日欲棲鳥壁裏青燈乍有無小雨愔愔人假寐臥聽疲馬  
齧殘芻

召試學士院

王欽臣

翠木陰陰白玉堂長年來此試文章日斜奏罷長楊賦閑拂塵埃  
看書牆

題淺沙泉

黃履

瀾低沙淺一泓寒雨不增深旱不乾要識有源為可取餘波更向  
大江看

次韻答學者

陳師道

太阿無前鋒不缺鉛刀不堪供一切至柔繞指剛則折善而藏之  
光奪月

寄都下故人示王子安

陳師道

湖海相忘日自疎經年不作一行書世閒惟有韓康伯肯為淵明  
住世餘

絕句

陳師道

里中餽杏得嘗新馬上逢花始見春勤苦著書如作吏世閒枉是  
最閑人

贈吳氏兄弟

陳師道

得失嬾妍只自知略容千載有心期恨君不識金華伯何處如今  
更有詩

絕句

陳師道

書當快意讀易盡客有可人招不來世事相違每如此好懷百歲  
幾回開

經筵大雪不罷講二首

呂希哲

水晶宮殿玉花零點綴宮槐臥素屏特勅下簾延墨客不因風雪  
廢談經

強記師承道古先無窮新意出陳編一言有補天顏動全勝三軍  
賀凱旋

曾點

呂大鈞

函丈從容問所酬展才無不至諸侯可憐曾點惟鳴瑟獨對春風  
詠不休

題宣州後堂壁

張耒

過兩山亭暑氣微老人猶未試生衣滿園閑綠無人到春日南風燕子飛

桓武公

張耒

北征談笑縛姚公靜埽諸陵見洛嵩不用登高笑夷甫正緣此輩使君雄

絕句

張耒

風掉浮煙匝地回雨將濃翠撲山來晚涼鼓角三吹罷夕照江天萬里開

漫成

張耒

閉門春風作往還誰家有花堪醉眠柳腰榆莢爭入眼江梅一枝遠如天

北郊

呂大臨

村北礪田久廢耕試投嘉穀望秋成天時地力難前料萬粒須期

一粒生

送劉戶曹

呂大臨

學如元凱方成癖文似相如反類俳獨立孔門無一事唯傳顏氏得心齋

題驛舍

盧秉

青衫白髮病參軍旋糶黃糧買酒尊但得有錢留客醉也勝騎馬傍人門

送呂子進

張舉

籬鷄雲鵬各有程匆匆送別未忘情恨君不在蓬籠底共聽蕭蕭夜雨聲

守關

劉季孫

晨雞三叫未開關留滯行人更解鞍卻上月明高處立曉風吹面作清寒

題李世南畫扇

蔡肇

野水潺潺平落澗秋風瑟瑟細吹林逢人抱甕知村近隔塢聞鐘  
覺寺深

自歎

任伯雨

當年言路亦逡巡白簡青蒲十一人半斥炎荒半除籍而今無一  
預朝紳

感古二首

任伯雨

一言借諭資鍾會意在張華亦已深大抵知言由養氣可憐晉武  
有蓬心

指鹿姦謀豈偶然都緣人事不由天要知左右皆言馬只為當時  
殺正先

途中

張公庠

一年春事又成空擁鼻微吟半醉中夾路桃花風雨過馬蹄無處  
避殘紅

張辟疆

劉跂

老畫駸駸不可攀風流依約片言還小兒若悟他年事肯復生心  
涕淚閒

春日村居

崔鷗

春草門前已沒靴更無人過野人家離離細竹時聞雨淡淡疎簾  
不隔花

讀漢書

鮑欽止

漢公事業比阿衡純用詩書至太平它日何人頌功德至今嘲笑  
亦諸生

垂虹亭

米芾

斷雲一葉洞庭帆玉破鱸魚霜破柑好作新詩繼桑苧垂虹秋色  
滿東南

題泗濱南山石壁曰第一山

米芾

京洛風沙千里還船頭出汴翠屏閒莫論衡霍撞平聲星斗且是東  
南第一山



杜牧

弟病兄孤失所依當時書語最堪悲豈圖乞得南州後卻恨尋芳去較遲

田畫

墨子

末學紛紛自有師能言兼愛我猶疑定知空駕雲梯後卻悔初心泣染絲

田畫

見降羌感事

沙場尺箠致羌渾玉陛朝趨雨露恩自笑百年家鳳闕一生腸斷國西門

晁詠之

暮雨

晚雨牆東暗綠槐清陰亭院鎖莓苔委階紅藥將春去點水青荷與夏來

謝邁

雨中謾成

東風渾作勒花寒寂寞林塘不受看玉板鶴翎俱未識梨梢空有

謝邁

淚欄干

村老

肉死皮乾垂鬢絲尋暄扶杖向東籬文王沒後無人問直至而今大半飢

馬存

自齊山借舟泛湖還家

曹緯

十里平湖漫不流晚風吹浪打行舟定知歸得侵燈火家在菰蒲最盡頭

茅塘馬上

賀鑄

壯圖忽忽負當年回羨農家過我賢水落陂塘秋日薄仰眠牛背看青天

宋文鑑卷第二十八

宋文鑑卷第二十九

詩

雜體

星名

二十八宿歌贈无咎

黃庭堅

人名

和蕭十六

孔平仲

郡名

郡名詩呈呂元鈞

孔平仲

藥名

登湖州銷暑樓

陳亞

荆州即事五首

黃庭堅

建除

重贈徐天隱

黃庭堅

八音

八音歌答黃魯直

晁補之

四聲

還鄉展省道中作四聲詩寄豫章僚友

孔平仲

藏頭

寄賈宣州

孔平仲

呈章子平

孔平仲

離合

藥名離合四時四首

孔平仲

回紋

泊鴈頰

王安石

一字至十字

詠竹

文同

兩頭纖纖

兩頭纖纖二首

張舜民

五雜組

五雜組四首

孔平仲

了語不了語

了語

孔平仲

不了語

孔平仲

難易言

難易言二首

蘇舜欽

聯句

劍聯句

風琴聯句

悲二子聯句

地動聯句

集句

送吳顯道

王安石

戲贈湛源

王安石

與北山道人

王安石

示蔡天啟

王安石

烝然來思

王安石

集杜句寄孔元忠

孔平仲

星名

二十八宿歌贈无咎

黃庭堅

虎剝文章犀解角食未下亢奇禍作藥材根柢羅斷掘蜜蜂奪房  
抱饑渴有心無心材慧死人言不如龜曳尾衛平哆口無南箕斗  
柄指日江使噫狐腋牛衣同一燠高邱無女甘獨宿虛名挽人受  
實禍累某既危安處我室中凝塵散髮坐四壁蠹蠹見天下奎蹄  
曲隈取脂澤婁豬艾緞彼何擇傾腸倒胃得相知貫日食昂終不  
疑古來畢命黃金臺佩君一言等蜚鱗月沒參橫惜相違秋風金

井梧桐落故人過半在鬼錄柳枝贈君當馬策歲晏星回觀盛德  
張弓射雉武且力白鷗之翼沒江波抽絃去軫君謂何

人名

和蕭十六

孔平仲

式微子歎歸期滯疎鍾皓月僧窗睡滿郭丹楓已送秋李白桃紅  
春又至綠楊朱戶鎖娉婷燕趙壹笑誰相視紅顏回眄能溺人有  
若大川無際涘吾曹操行薄雲天去險就平當擇地嚴君平昔教  
諸子肯向贛江爲此事勿捐仁義縱歡娛力與主張興廢墜不才  
疆使酬杜詩搦管能令言鄙志

郡名

郡名詩呈呂元鈞

孔平仲

相人觀久遠要且視資質酒酸本多甘絹敗爲少密公家渭川後  
端亮氣不屈播移雖裔土寧妥如舊華優游歸孔聖坎壈笑趙壹  
儻來等榮辱所遇順勞佚道閤接談賓文房散書帙當其泰定時

海宇更無物耳目并已忘何心  
斲窳黻忽聞韶曲奏更覺巴音失  
溫純比金玉清越勝琴瑟似追少  
陵步真得建安骨從今益淬厲  
及此舒長日唱酬安敢同心欽  
但齋栗

藥名

登湖州銷暑樓

陳亞

重樓肆登賞豈羨石爲廊風月前湖近軒窗  
半夏涼曾青識漁浦芝紫認仙鄉卻恐當歸  
闕靈口爲別傷

荆州卽事五首

黃庭堅

四海無遠志一溪甘遂心牽牛避洗耳臥著  
桂枝陰前湖後湖水初夏半夏涼夜闌鄉夢破  
一鴈度衡陽垂空青幕六一一排風開石友常  
思我預知子能來幽澗泉石綠閉門聞啄木  
運柴胡奴歸車前掛生鹿雨如覆盆來平地沒  
牛膝回望無夷陵天南星斗溼

建除

重贈徐天隱

黃庭堅

建極臨萬邦稽古 陛下聖除書日月下有耳  
家相慶滿意見升平父老扶杖聽平生所傳聞  
似 仁祖德性定鼎百世長橐弓四夷靜執事  
當在朝官冷殊未稱破帽風欹欹簡易不騎乘  
危顛相扶持泉石共嘲詠成樂湖阿中傲世似未  
敬收潦下秋船期公拜嘉命開元命觀事身得見  
全盛閉門長蓬蒿或許老夫病

八音

八音歌答黃魯直

晁補之

金蘭况同心莫樂新相知石田罹清霜念此百草  
腓絲看煮繭吐士聽憤悱語竹馬非妙齡美人恐  
遲暮匏繫魯東家今君尙天涯土膏待陽瘴氣至  
如咄嗟革薄不可廓士迫下流惡木無松柏心  
竭處螻蟻託

四聲

還鄉展省道中作四聲詩寄豫章僚友 孔平仲

蕭灘波滌浚巴邱山崔嵬江天如相迎風吹浮雲開思鄉人皆然  
惟子頻歸來松楸彌青鮮春容生泉臺久雨水陡長泱泱似海廣  
葦底解小艇曉起蕩兩漿早飯野篠下鳥語靜愈響有酒我不飲  
引領但子想四際又暮夜意詣尚未到繫纜坐樹蔭嘒嘒聚噪  
徑步氣向暝岸嘯韻自報內顧自慰幸比歲屢拜埽執熱逼入伏  
一葉益局促日落月欲出豁若脫桎梏木色鬱碧幄竹節削綠玉  
赤腳踏白石宿泊得沐浴

藏頭

寄賈宣州

孔平仲

高會當年喜得曹日陪宴衍自忘勞力回天地君應憊心狹乾坤  
我尚豪豕亥論書非素學子孫千祿有東臯十年求友相知寡分  
付長松蔭短蒿

呈章子平

孔平仲

玉駱聲華星斗傍方州投老憩甘棠木逃翦伐枝長碧石耐鐫磨

性有常巾褚藏經勤問學子孫傳業富文章十年留落歸何暮日  
聽除書侍玉皇

離合

藥名離合四時四首

孔平仲

草滿南園綠青青復閒紅花開不埽地錦繡逕相通  
漿寒飲一石蜜液和巖桂心渴望天南星河粲垂地  
參旗挂綵木通夕涼如水銀漢耿半天河橋暝煙紫  
雪片擁頰垣衣裘冷如甲香醪不滿榼藤枕欹殘臘

回紋

泊鴈頰

王安石

泊鴈鳴深渚收霞落晚川柝隨風斂陣樓映月低弦漠漠汀帆轉  
幽幽岸火然壑危通細路溝曲繞平田

一字至十字

詠竹

文同

竹竹森寒潔綠湘江濱渭水曲帷幔翠錦戈矛蒼玉心虛異眾草  
節勁踰凡木化龍杖入仙陂呼鳳律鳴神谷月娥巾較靜苒苒風  
女笙竽清簌簌林閒飲酒碎影搖罇石上圍碁輕陰覆局屈大夫  
逐去徒悅椒蘭陶先生歸來但尋松菊若論檀樂之操無敵於君  
欲圖瀟灑之姿莫賢於僕

兩頭纖纖

兩頭纖纖二首

張舜民

兩頭纖纖女梭半白半黑右軍鵝膈膈膊膊石子坡磊磊落落

大風歌

兩頭纖纖蠶縮絲半白半黑蠅蠹之膈膈膊膊母赴兒磊磊落落  
忠臣詞

五雜組

五雜組四首

孔平仲

五雜組垂衣裳往復來就桀湯不獲已翦夏商

五雜組花木春往復來江湖人不獲已議和親

五雜組錦繡段往復來隨陽鴈不獲已猶仕宦

五雜組朝霞明往復來車馬行不獲已方用兵

了語不了語

了語

孔平仲

公餗欲成忽覆鼎銀餅汲絕還沈井乳虎咆哮落深窞青劍一揮

斷人頸

不了語

孔平仲

無言以手尋珮環寒暑迭運彫朱顏八駿踏地幾時徧六龍駕日

何年閑

難易言

難易言二首

蘇舜欽

擬把鉛刀伐丹桂欲坐胥井攀青天排羅嬰兒拒九虎未若以道

千貴權

地上拾芥亦細碎掌裏數文猶苦辛脫使摘丸下峻阪未若以財而發身

聯句

劍聯句

范仲淹

歐陽脩

滕宗諒

聖人作神兵以定天下厄范蚩尤發靈機千將構雄績歐橐籥天地開鑪冶陰陽闢滕南帝輸火精西皇降金液歐炎炎崑崗熒洶洶洪河擘范雷霆助意氣日月淪精魄滕神氣不在天錯落就三尺歐直淬臨溪泉橫磨太行石歐雄雌威並立晝夜光相射范提攜風雲生指顧煙霞寂滕堅剛正人心耿介志士跡歐初疑成夏鼎魑魅世所適滕又若引吳刀犀象謂無隔范截波虬尾滑脫浪鯨牙直歐頑水挂陰雷皎月乘孤隙歐河角起彗氣雲罅露秋碧范曉鐔星斗爛夜匣飛龍宅范舞酣霰雪回彈俊球琳擊滕鮮搖雪水光膩亂湘山色滕青蛟渴雨瘦素虺蟠霜脊歐清高鏘以鳴寒姿堅且澤范鬼類喪影響佞黨摧肝膈歐一旦會神武四海屠

兇逆范周王奉天討商郊千里赤歐楚子揚軍聲秦師萬首白范祥輝冠吳楚殺氣橫燕易范與君斬鼉足八極停震虢歐辱翁刺鵬翼三辰增煥赫范莫使化猿翁辱我為幻惑范莫使暴虎人屈我執仇敵滕尊嚴侯冠冕左右舞干戚歐功成不可留延年空霹

風琴聯句

謝壽希深

梅堯臣聖俞

竅竹漏天風張絃擬嶧桐佳名從此得妙響未曾窮希深夜靜危臺上人閑皎月中依依聽不足秋露滿蘭叢聖俞

悲二子聯句

蘇舜欽

子美

二子謂穆修

有客自遠方來以二子說穆子疾病初家事巨細缺鄰人苦其求才翁醫師久已決案盃小大空布被旁午裂餘喘尚能鼓子美老憤知已結目淒望羊溷髭斷反蝟苗憂酸繫餘生才翁圓曲勿自悅吾屬何流離眾人方草竊凌子久道路才翁十口著羈屑恰旅重江閒正值大饑節既無裹飯交子美疾走繼麤糲又無執漿人



及時沃枯渴惜哉殞天命才翁痛焉在親經帝胡生爾身世復稱  
其傑胷伏氣萬丈子美腸貯怨百折艱難泊風波憔悴墮霜雪久  
僕勤龍鍾才翁弱女癡躓文隨寒餓空道與煙焰滅魂兮竟何  
歸子美去矣不得別長府豈無財莫濟醫藥切太倉豈無粟才翁  
莫解腹腸熱天子聖在上海內清欲澈伊人胡不官子美既死安  
得活朝青與暮紫神喜天不軋昂車與怒馬才翁門滿道不絕之  
子苟閒厠斯民乃貪饕高亢世弗親子美方巖鬼所掣敢言才足  
珍寧免否來鬻思潛淚輒抽才翁慘舊面成蓋舉目此牢落側身  
今鄙蝶箴言耳空虛子美險論口吮腕作詩告石梁聊以慰寒骨  
才翁

地動聯句

蘇舜元 舜欽 叔才舜元舊字也

大荒孟冬月叔才末旬高春時日腹昏盲俚子美風口鳴嗚啞萬  
靈困陰戚叔才百植嗟陽衰濃寒有勝氣子美大凍無敗期六指  
忽搖拽叔才羣蹠初奔馳丸銅落蟾吻子美始異張渾儀列宿犯

天紀叔才預驗漢志辭民農雨鼓舞子美禁堞疆崩離坐駭市聲  
死叔才立怖人足踣垣途重車債子美急傳壯馬欷陵阜動撫手  
才叔才礫塊當揚箕停汚有亂浪子美僵木無靜枝眾啄不暇息叔才  
才叔才沓嶂驚欲飛踊塔撼鐸碎子美安流蕩舟疲倒壺喪午漏叔才  
顛巢駭眠鳴居人眩眸子美行客勞觸兒南北頓儵忽叔才西  
東播戎夷四鎮一毛重子美百川寸涔微斗藪不知大叔才軒輕  
主者誰共工豈復愁子美富媪安得為密無折軸患叔才頓易崩  
山悲眾蟄不安土子美羣毛難麗皮驚者去靡所叔才仆或如見  
擠轟雷下簷瓦子美決玉傾倉桑雙顛太室吻叔才四躍宸庭螭  
萬宇變旋室子美孤陽病其威傳是下乘上叔才必由政瑕疵勝  
社勇厥氣子美猶不可保之况乃易動物叔才何以能自持高者恐  
至靜者子美下者當鎮綏天戒豈得慢叔才兼為丹辰規偉哉聰明主  
息子美損降禍可違願進小臣語叔才

子美勿遺地動詩

叔才

集句

送吳顯道

王安石

五湖大浪如銀山問君西遊何當還以手撫膺坐長歎空手無金  
行路難丈夫意有在吾徒且加餐屏風九疊雲錦張千峯如連環  
上有橫河斷海之浮雲可望不可攀飛空結樓臺動影裏宛冲融  
閒沛然乘天遊下看塵世悲人寰泊舟潯陽郭去去翔空廓君今  
幸未成老翁衰老不復如今樂

戲贈湛源

王安石

恰有三百青銅錢憑君為算小行年坐中亦有江南客自斷此生  
休問天

與北山道人

王安石

可惜昂藏一丈夫生來不讀半行書子雲識字終投閣幸是元無  
免破除

示蔡天啟

王安石

身着青衫騎白馬日馳三百尚嫌遲心源落落堪為將卻是君王  
未備知

烝然來思

王安石

烝然來思送程公也公來以薨麋饋我我飲餞之率西水滸故作  
是詩

念我獨兮亦莫我顧烝然來思程百休父我有旨酒爾殽伊脯酌  
言醕之式歌且舞不留不處適彼樂土言秣其馬率西水滸有客  
宿宿于時語語山有橋松江有渚式遄其歸不我與作此好歌倡  
予和女

集杜詩句

寄孫元忠

孔平仲

君不見瀟湘之水衡山高八月秋高風怒號草木黃落龍正蟄哀  
鴻獨叫求其曹男兒生無所成頭皓白漂零已是滄浪客呼兒覓  
紙一題詩此心炯炯君應識

宋文鑑卷第二十九終

宋文鑑卷第三十

騷如騷者亦附

山中之樂

逐伯強文

屈原蝦辭

釋謀

寄蔡氏女子

九誦

上清辭

黃泥坂詞

南山之田

我思古人

山中辭

江上辭

歐陽脩

劉敞

劉敞

王安石

王安石

鮮于侁

蘇軾

蘇軾

王令

王令

王令

王令

放言

狄遵度

幽命

沈括

題禹廟壁

劉彝

詆風穴

劉放

弔王右軍宅辭

錢公輔

解雨送神曲

李常

超然臺辭

文同

濂溪詩

黃庭堅

明月篇贈張文潛

黃庭堅

秋風三疊寄秦少游

邢居實

華清宮詞五首

田畫

山中之樂

歐陽脩

佛者惠勤餘杭人也少去父母長無妻子以衣食于佛之徒往來京師二十年其人聰明材智亦嘗學問于賢士大夫今其南歸遂

將窮極吳越甌閩江湖海上之諸山以肆其所適予嘉其嘗有聞於吾人也於其行也為作山中之樂三章極道山林閒事以動蕩其心意而卒反之正其辭曰

江上山兮海上峯靄青蒼兮杳嶺叢霞飛霧散兮邈乎青空天鏡鬼削兮壁立於鴻蒙崖懸磴絕兮險且窮穿雲渡水兮忽得路而不知其深之幾重中有平田廣谷兮與世隔絕猶有太古之遺風泉石甘土肥兮鳥獸雖離其人麋鹿兮既壽而豐不知人間之幾時兮但見草木華落為春冬嗟世之人兮曷不歸來乎山中山中之樂不可見今子其往兮誰逢

其一

丹莖翠蔓兮巖壑玲瓏水聲聒聒兮花氣濛濛石巉巖兮橫路風颯颯兮吹松雲冥冥兮雨霏霏白猿夜嘯兮青楓朝日出兮林閒澗谷紛兮青紅千林靜兮秋月百草香兮春風嗟世之人兮曷不歸來乎山中山中之樂不可得今子其往兮誰從

其二  
梯崖架險兮佛廟仙宮耀空山兮鬱穹隆彼之人兮固亦目明而  
耳聰寵辱不干其慮兮仁義不被其躬蔭長松之蒼蔚兮藉纖草  
之丰茸苟其中以自足兮忘其服乎而顛童自古智能魁傑之士  
兮固亦絕世而逃蹤惜天材之甚良兮而自棄於無庸嗟彼之人  
兮胡為老乎山中山中之樂不可久遲子之返兮誰同

其三

逐伯强文

劉敞

寶元二年予羈旅淮南醫來言曰今茲歲多疾疫予因作文以逐  
伯强伯强厲也能為疫者故逐之

皇皇上天兮后土浩浩厥生孫繁兮其施甚溥陶陶仲夏兮草木  
蕃蕪鳥獸孳息兮我民樂胥我民孔靈兮上帝是仁天子聖兮百  
工日新上無糶政兮下無恃人鄰里其集兮樂哉欣欣伯强何為  
兮孰畀以政反世五福兮持極以合我民不怡兮既爽其盛白黑  
眩瞽兮孰察其正謂壽反天兮謂康反病仁義无益兮苟且為幸  
嗟爾伯强兮其獨何心絕世和氣兮俾民不任上天孔神兮大德  
曰生天不可長罔兮民不可久侵天誅誠加兮安所避雷公驅兮  
風伯逝嗟爾伯强兮何所詣南有蠻兮為寇為逋西羌戎兮恃艱  
自虞天子孔仁兮靡焉畢屠伯强往兮代天伐誅嗟中國兮不可  
久留予不去兮顛倒思予

屈原嘏辭

劉敞

梅聖俞在江南作文祝于屈原譏原好競渡使民習尚之因以鬪  
傷溺死一歲不為輒降疾殃失愛民之道其意誠善也然競渡非  
屈原意民言不競渡則歲輒惡者訛也故為原作嘏辭以報祝明  
聖俞禁競渡得神意

唯時仲夏吉日維午神歆既祠錫辭以嘏曰朕之初皇揆予度嘉  
朕以名終身是守抑豈不淑不幸逢遇離愍被憂天不可訴宗國  
為墟寧取自賊朕為忍生豈不永年悁悁荆人是拯是憐赴水蹈

波疾不廢旃旣招朕魂巫祝皆先豈朕是私將德是傳淪胥及溺  
初亦不悛其後風靡民益輕死匪朕之心是豈為義婦弔其夫母  
傷其子人訊其端指予以詈予亦念之其本有自昔朕婞直不為  
眾下世子尚之謂予好怒昔朕不容自投于江世子尚之謂予弃  
躬既習而鬪既遠益繆被朕偽名汗朕以咎朕生不時亂世是遭  
民之秉彝嘉是直道從仁於井朕亦不取汝禁其俗幸懷朕忠好  
競以誣一何不聽我實鬼神民焉是主其祀其禱予之所厚予懼  
天明焉事戲豫予憫橫流焉事競渡予懷堯舜焉事狎侮汝維賢  
人曾不予怒徇俗雷同譏予以好履常徇直切諫盡節人神所扶  
未必皆福去邪即正何以有罰曾非予懷可禁其為母使佞臣指  
予為戒錫爾多福畀爾麗眉使爾忠言于君畢宜

釋謀

王安石

雲冥冥兮蔽日風浩浩兮吹沙出予馳兮不得魂獨處兮咨嗟嗟  
天地兮無窮暑與寒兮相客以短褐兮憂親孰知予兮孔棘維抱

關兮擊柝乃予仕兮所宜祿可辭兮尚冒養孰割兮方虧豈吾事  
兮固拙寧我辰兮獨悖信物黠兮有制尚可侔兮內外

寄蔡氏女子

王安石

建業東郭望城西堠千嶂承宇百泉遶青遙遙兮纒屬綠宛宛  
兮橫逗積李兮縞夜崇桃兮炫晝蘭馥兮眾植竹娟兮常茂柳蕙  
綿兮含姿松偃蹇兮獻秀鳥跂兮下上魚跳兮左右顧我兮適我  
有班兮伏獸感時物兮念汝遲汝歸兮攜幼

九誦

鮮于侁

堯祠

車麟麟兮廟壘鼓坎坎兮祠下竽琴兮並奏潔時羞兮虔祠事瑤  
華為饌兮沆瀣為漿象籩玉豆兮金鼎煌海珍野蔌兮雜錯而致  
誠神之來兮風雨瀟瀟前驅罕畢兮上有招搖羽林為衛兮虹霓  
為旗鳳凰左右兮擾伏蛟螭神之降兮金輿靈欣欣兮肸鬻德難  
名兮覆燾千萬年之不忘

舜祠

道歷山兮透蛇思古人兮感歎並儲胥兮肅止仰曾雲兮曖曖獸  
何鳴兮林中鳥何悲兮山上木何為兮不翦草何為兮茂暢帝之  
神兮在天帝之德兮在人物具兮四海心精兮一純采秀實兮出  
閒摘其毛兮澗底玉醴湛兮瓊茅肴脩雜兮蘭茝樂備兮九奏鳳  
舞兮儀韶人駿奔兮如在君卒享兮神交

周公

噫嗟兮文公歸然兮祕字悵王室兮多難獨勤勞兮左右四國流  
言兮沖人不知東征問罪兮悄悄不歸大電以風兮天威震驚弁  
啟金滕兮袞衣有光公之心兮大成文武公之子兮建侯啟土山  
川兮附庸奄鳧繹兮龜蒙萬子孫兮承祀億兆人兮仰止惟夫子  
之嘆嗟兮不復見於寤寐何莽新之假攝兮文姦言而欺一世造  
作詭故而戕劉兮亦亟殄宗而絕嗣公之聖而德協天兮何妄人  
之輒自擬俾其顛而不終兮天實表公衷而警後肅進拜於廟堂

兮宜奉時之牲酒鼓鍾兮在宮琴瑟兮在堂神之格兮樂享民欣  
欣兮不忘

孔子

曲阜兮遺墟先師兮闕里神髣髴兮如在涕潺湲兮不已窮天地  
兮一人揭日月而照臨生無萬乘之位兮三千之徒心服而四來  
嗟愚陋之不明兮乃商賜之為疑羌紛紛其妄作兮悖道違義而  
弗自知顧六藝之折衷兮取捨縱橫而協于道後世苟輕肆於胷  
臆兮必遽貽於詭病三綱立而五教明兮實治世之宏矩履厚地  
而戴高天兮胡一日之可捨宜萬齡之廟貌兮春秋不乏其時祀  
合仁義以為冠兮結忠信而為佩集道德以為裳兮服文章而為  
帶列籩豆為左右兮蘋藻牲牢而潔肥酌玉醴以為酒兮錯瓊瑤  
而為粢升堂而北面兮望冕旒之巍巍惟神明之降鑒兮洞精神  
其來歆

嶽神

雲蔚蔚兮山之巔瞻嶽靈兮望青天嶄巖峭兮磅薄無垠巉  
崒勃兮寧一以為仁草木雜而羅生兮人不可名鳥獸蕃而走集  
兮虞不能知因高錯事兮道此躋陸登岱勒成兮胡為而七十二  
君齊余心兮不外高余冠兮甚偉擷芳杜兮為衣掇紫芝兮作佩  
柏實兮松華石體兮蘭英蕙肴陳兮玉案明水湛兮清尊誠拳拳  
兮不解麻接神兮恍若有言嵩高峻極兮生甫與申周道將明兮  
宣以中興水旱不常兮蟲螟以災稼穡卒荒兮民生流離勞來安  
集兮之子之功祐此下民兮寧遺神羞

瀆神

清秋方初兮霪雨降而無時舊坊弗治兮河水泛濫而為災滂汨  
沸渭兮澎湃奔波而需來崩騰覆溺兮夫豈河伯之不仁汗漫千  
里兮蕩然室閭耄稚驚號兮邱冢為家蛟螭憤怒兮魚鼈縱橫鼉  
鼉馳驚兮鳧鶩飛翔皇天無親兮視聽以民五序參差兮咎極以  
滋聖惟唐堯兮固遭橫流臣有舜禹兮輿心所依禦災拯溺兮九

敘可歌四凶遂去兮二八以陞天地平成兮海隅蒙福白馬玉璧  
兮非神之欲

箕子

偉夫子之正諒兮適遭世以離尤悼祖宗之累積兮大命顛而逢  
憂忠良奔遠兮讒諛寢昌神龜在塗兮虺蟒升堂紫鸞簸置兮鳩  
羽飛揚騶虞潛遜兮豺虎縱橫江離鉏割兮鉤吻日滋芳荃不御  
兮蔓草難圖比干剖心兮夫子佯狂蒙以正兮大明其傷靈脩不  
察兮國以云亡舊邦維新兮武功以成囚奴釋辱兮作賓於王九  
疇演繹兮大法以彰五事欽明兮君道日隆彝倫攸敘兮庶政其  
凝朝鮮分封兮夷貊化行傳國中山兮蕃子以孫廟貌有嚴兮祀  
典攸存歲時奉事兮斯千萬年

微子

肇公孫之璇源兮玄鳥降而生商並禹稷之聖賢兮實惟桓撥之  
王歷嬀妣之世數兮道日躋於武湯始伐罪於仇餉兮人怨咨而



後來顧寬仁之宜民兮天俾式於九圍諒除殘而代虐兮猶云德  
之有慙賴燕翼於孫謀兮治克舉於三宗老成不怨於不以兮隱  
處不傷於厄窮世四十有六而下衰兮豈天命之將隳實遭家之  
不嗣兮顧麗色之惟微念社稷之顛傾兮七廟無所憑依帝眷在  
於有周兮抱祭器而焉歸雖白馬之見廟兮聊血食於商邱偉夫  
子一言兮誠有取於三仁

雙廟

旄頭光芒兮戎馬馳海水沸蕩兮鯨鯢飛煙塵蔽日兮殺氣昏金  
鼓轟天兮山岳奔小國不守兮大國顛傾王侯戮辱兮虵豕肆行  
二公仗義兮捍賊睢陽析骸易子兮併力小城勢窮力殫兮外無  
救兵亡身徇國兮寧屈虎狼仰天視日兮氣以揚揚衣纓不絕兮  
貌如平生旅遊馳驅兮歷此舊都致詞雙廟兮涕泗不收惟忠與  
孝兮死義爲尤遭世擾攘兮適履其憂訐謀顛置兮邊將怙功尾  
大權移兮三鎮握兵忠賢在野兮讒邪肆意女謁內用兮戚臣外

圯紀綱日紊兮典刑日弛胎旤階亂兮誰執其咎義士沒身兮沈  
寃莫置猗歎二公兮行人歎歎

上清辭

蘇軾

君胡爲乎山之幽顧宮殿兮久淹留又曷爲一朝去此而不顧兮  
悲此空山之人也來不可得而知兮去固不可得而訊也君之來  
兮天門空從千騎兮駕飛龍隸星辰兮役太歲儼晝降兮雷隆隆  
朝發軔兮帝庭夕弭節兮山宮曠有妖兮虐下土精爲星兮氣爲  
虹愛流血之滂沛兮又嗜瘡癘與螟蟲嘯盲風而涕淫雨兮時又  
吐旱火之煙融銜帝命以下討兮建千仞之脩鋒乘飛霆而追逸  
景兮歛耒耨滅而無蹤忽崩播其來會兮走海岳之神公龍車獸  
鬼不知其數兮旗纛掩靄而冥蒙漸俯偃以旅進兮鏘劍佩之相  
礮司殺生之必信兮知上帝之不汝容旣約束以反職兮退戰慄  
而愈恭澤充塞於四海兮獨淡然其無功君之去兮天門開款閭  
闔兮朝玉臺羣僊迎兮塞雲漢儼前導兮紛後陪歷玉階兮帝迎

勞君良苦兮馬虺隤閔人世兮迫隘陳下土兮帝所哀返瓊宮之  
嗟我兮役萬靈之喧逐默清淨以無爲兮時節狩於斗魁詣通明  
而獻黜陟軫蕩蕩其無回忽表裏之煥霍兮光下燭於九陔時遊  
目以下覽兮五岳爲豆四海爲杯俯故宮之千柱兮若毫端之集  
埃來非以爲樂兮去非以爲悲謂神君之既返兮曾顏咫尺之不  
違陞祕殿以內悸兮魂凜凜而上馳忽寤寐以有得兮沐浴而獻  
辭是邪非邪臣不可得而知也

黃泥坂辭

蘇軾

出臨皋而東驚兮並叢祠而北轉走雪堂之坡陁兮歷黃泥之長  
坂大江洶以左繚兮渺雲濤之舒卷草木層累而右附兮蔚柯邱  
之葱蒨余旦往而夕還步倚徙而盤桓雖信美不可居兮苟娛余  
於一盼余幼好此奇服兮襲前人之詭幻老更變而自晒兮悟驚  
俗之來患釋寶璐而被繪絮兮雜市人而無辨路悠悠其莫往來  
兮守一席而窮年時游步而遠覽兮路窮盡而旋反朝嬉黃泥之

白雲兮莫宿雪堂之青煙喜魚鳥之莫余驚兮幸樵蘇之我媪初  
被酒以行歌兮忽放杖而醉偃草爲茵而塊爲枕兮穆華堂之清  
晏紛墜露之溼衣兮升素月之團團感父老之呼覺兮恐牛羊之  
子踐於是蹶然而起起而歌曰月明兮星稀迎余往兮餞余歸歲  
既晏兮草木腓歸來歸來兮黃泥不可以久嬉

南山之田

王令

南山之田兮誰爲而蕪南山之人兮誰教墮且來者何爲兮徑者  
誰趾草漫靡兮不種何自始吾往兮無耜吾將歸兮客我止要以  
田兮寄於治我耕淺兮穀不遂耕之深兮石撓吾耒吾耒撓兮嗟  
耕難雨專水兮日專旱借不然兮穎以秀螟懸心兮騰開口我雖  
力兮功何有雖然不可以已兮寧時我違而我不負

我思古人

王令

我所思兮忽古今之異時生茲世以爲期欲勿思而奈何獨斯人  
之弗見故永懷而自歌樂吾行之舒舒忽忘世之汲汲睇萬里以

自驚兮豈寧俯以効拾載重道遠兮予欲行而誰與累九鼎以自  
重兮固甦之不舉矯身以爲衡兮權世之重輕廣道以爲路兮聽  
人之來去

山中辭

王令

山中兮何遊登彼山兮樂夫高弃吾馬兮取步降吾車兮足兩屨  
石當道兮行旁木礙上兮下俯曾蹈險之非艱聊憑高而下顧何  
所視之乃牛而獨見之如鼠彼侏侏者出其下兮曾其身之非偃  
于嗟徂兮離婁之死則已古不較其爲短長兮何獨計其高下山  
之高兮崔嵬山之路兮百折而千回趨前行而就攬笑顧後使推  
之彼遊者誰兮何以子之車來

江上辭

王令

江之水兮東流湑湑流兮寄吾舟舟無柁兮載函重風乘波兮棹  
人用濟不濟兮奈何橫中流兮涕滂沱來何爲兮不待今雖嗟兮  
安悔舟方乘兮人不吾以覆且溺矣我同人死江之水兮東流濟  
欲濟兮何由水浸浸兮灘露暮濤下兮夜潦收舟不行兮推之於  
陸力不足兮汗顏行無由兮塗足時不逝兮奈何歸日暮兮塗遠  
風高兮水波行躊躇兮竚望聊逍遙兮永歌江之水兮東流沿湑  
流兮望歸舟舟來歸兮何時步芳洲兮濯足陟南山兮采薇江風  
波兮日暮望夫人兮未來江之水兮東流沿湑流兮望歸舟風泊  
滔兮浪波若嗟往者兮未還惜行人兮將去去何道兮歸何時執  
子手兮牽子衣行何如兮來復濟豈無兮它時

放言

狄遵度

惆兮忽長不樂兮安極眺平野兮千里坐空館兮四壁對寒日兮  
蒼莽披勁風兮悽慄鳥悲鳴兮羣喪草離披兮路塞嗚呼物之生  
天地間雖大小參差不齊然其材亦各有所適草木不以微而廢  
其用陵邱不以大而專其職獨人事豈不然亦由茲而可識性之  
稟既有賢愚之異位之設亦有貴賤之隔使大小各得盡其材譬  
一體之和憚及年歲之未暮兮思欲竭其所得曷獨求已之爲兮

顧泯然者可惻古之聖賢固癯瘁而不敢暇兮畏天命之誅殛天之賦已以是材兮敢不奉而驚惕嗚呼而今而後用與不用吾將繫之於天在已之有固斯須而不敢斲

幽命

沈括

山木嘯兮雲幽幽秣我歸馬兮無爲久留江颺翔兮雨漫漫回予車兮水漸臆使何爲兮中野澹將洋兮疎鴛目遊兮形留鬱逍遙兮日下瀉慕兮流觀舞節兮浩望駟黃戾兮靡騁旋吾輪兮焉往不我虛兮斯辰思何爲兮鞅掌

題禹廟壁

劉彝

皇祐二年秋予自閩由太末登天台川陸閒行至于郡凡數千里觀山澤之可樹殖者或荒豬焉田畝之可畎澮者或漫滅焉自剡而西遇雨數日農田甚豐垂穫而遭霖潦之害春夏斯民飢孳瘵瘠未起者重困是水予心哀焉嗚呼宜樹殖而荒豬凍餒之源也宜畎澮而漫滅水旱之道也天地非不生且育然而吾民重罹飢

困贊乎化育之道未至焉耳夜過鑑湖人指南山而告曰禹廟也予具冠帶瞻望內起恭肅不覺感歎泣下旣而欲誌其事厥明次于會稽之門遂寫屋壁其歌曰  
地生財兮天生時聖賢之贊育兮咸適其宜畎澮距川兮川距海水旱罔至兮民無凍飢畝田是起兮帝載以熙萬世永賴兮胡不踐履而行之嗚呼禹乎誰知予心之增悲

詆風穴

劉放

背崧右洛兮維汝泱泱左界韓鄭兮前關魯陽陵邱曼延兮土膏脈良生植遂茂兮厥天且長咨飄風兮胡狼而狂乘冬肆威兮怒號以常通晝互夕兮日月奪光宇宙昏惑兮顛倒玄黃折枝排根兮松桂毀傷衝空動楫兮披戶登堂獸亡其曹兮鴻鵠失翔問誰尸之兮底此不祥曰茲穴之詭異兮竊神之機幽嶮窮奇兮狹中不夷鼓舞蜚廉兮招搖南箕平居無事兮淫樂而爾爲歷九州而遐觀兮孰樂土其若此獨蠻夷之僻陋兮乃自古記之矣邈炎洲

之荒忽兮汨大海其千里上霧下潦兮墊溢瘴癘魑魅羣起兮樂人之死蓄爲颶風兮瘡毒疵癘扶壽駕山兮舟航糜毀歷日旋時兮然後得已西極曠蕩兮陰積無垠流沙不波兮瀚海無泉五穀不生兮蓬棘藜藜熱風之來兮天地翳昏觸肥爲瘠兮四肢若燔亦幸有老駝之先知兮嗚呼而告言歸命野獸兮塵焉得存彼鬼方之幽明昧兮固宜以然慨中土之與鄰不避不偏胡穴神之忍兮固蔽以頑用夏變夷兮至于髦蠻外百里而不同兮茲邑獨爲匪民帝之高居兮臨照在下虎豹服仁兮九閩莫阻巫咸上愬兮帝命斯許巨靈夸娥兮幹其絕臂拔山投石兮北海之渚大野夷爽兮八風攸敘號令專一兮莫予莫侮蒙常聖時兮維民所取穴神雖悔兮夫孰閔汝

弔王右軍宅辭

錢公輔

晉王右軍宅辭越之載山爲浮圖而繪像存焉好事者猶能指墨池鵝池之遺迹而表識其上予嘗恨東南山之佳水之勝多奪於浮圖氏而衣冠隱淪無一人得之者既過右軍宅擲文以弔之曰晉去今兮千齡未餘彼山峩兮晉賢人之故居故居泯其幾時兮今變化於浮圖嗚呼傷哉絕雲巍崗葱蒼蒼竹茂草美煙高氣長占松翁兮虬盤怪石呀兮虎驤前稽嶺之橫峙兮下鑑水之輝光遠市井之喧卑兮據城壘之低昂春可遊而縱望兮夏可息而淒涼秋可登而感慨兮冬可處而樂康無一時之不得宜兮環一目而周四方眞孤高之所廬兮非醜族之能當生宜形體之放浪兮死宜魂魄之棲藏嗚呼傷哉彼靈何之兮默不聞一怪與一祥果無知兮徒結塞予之中腸果有知兮奚坐視緇徒之賊戕將後葉之湮淪兮無能振其祖芳抑亂離之荐遭兮百易主而百亡吾固弗得而知兮茲涕泗而倘佯嗟道之衰兮異姓類蠹侵而日昌嗟越之雄兮豈微一丈夫之勇剛如可贖兮雖萬金可捐萬室可償胡恬夷而莫醜兮往往助資其棟梁聊捐文於山之側兮將鑿石乎洲之堂嗟嗟越人窮千萬春兮宜吾文之弗忘

解雨送神曲

李常

怒風兮揚塵日爍石兮將焚水泉竭兮厚地裂嘉穀稿兮孰薈且  
耘神龍兮靈壑挹清波兮幽瀆鳴鼉鼓兮舞神覲庶下鑒兮霈祥  
氛  
觸石兮山巔倏四驚兮天邊驚霆怒兮電熾翻河漢兮繩懸黍離  
離兮發嘉穗壠高下兮水潺湲謹吾人兮拜祝請奉事兮無有窮  
年  
肅旂旃兮先驅咽簫笳兮擁歸輿椒醑甘兮牲幣潔如肸鬻兮爲  
之踟躕瞻前山兮嗟峩指去路兮縈紆神德大兮報無以稱徒感  
涕兮長吁

超然臺詞

文同

方仲春之盎盎兮覽草木之菲菲胡拂鬱於余懷兮悵獨處而無  
依陟危譙以騁望兮邱阜摧峩而參差窮莽蒼以極視兮但浮陽  
之輝輝忽揚颺以晦沫兮灑氣霾於四垂躋余之所行兮溷溷其  
安之蛻余神以遐驚兮控沆寥而上馳關隘暖以涉瀕洞兮揮霓  
旌而掉雲旗擺長彗以天矯兮從宛虹之委蛇曳采旒以役朱鳳  
兮駕瓊輶而驅翠螭涉橫潢以出沒兮歷大曠而蔽虧狎萬里以  
一息兮俯九州而下窺有美一人兮在東方去日久兮不能忘凜  
而潔兮岌而長服忠信兮被文章中皦皦兮外琅琅爲襟兮桂  
爲裳儼若植兮奉珪璋戢光耀兮秘芬芳賈世用兮斯卷藏遊物  
外兮肆猖狂余將從之兮遙相望回羊角兮指龍航轉岵夷兮蹴  
扶桑倚參山兮聊徜徉下超然兮拜其旁顧有問兮言非常忽掉  
頭兮告以祥使余脫亂天之罔兮解逆物之韁已而釋然兮出有  
累之場余復僊僊兮來歸故鄉

濂溪詩

黃庭堅

春陵周茂叔人品甚高胷中灑落如光風霽月好讀書雅意林壑  
初不爲人窘束世故權輿仕籍不卑小官職思其憂論法常欲與  
民決訟得情而不喜其爲少吏在江湖郡縣蓋十五年所至輒可

傳任司理參軍運使以權利變具獄茂叔爭之不能投告身欲去  
使者斂手聽之趙公閱道號稱好賢人有惡茂叔者趙公以使者  
臨之甚威茂叔處之超然其後迺寤曰周茂叔天下士也薦之於  
朝論之於士大夫終其身其爲使者進退官吏得罪者自以不寬  
中歲乞身老於湓城有水發源於蓮花峯下潔清紺寒下合於湓  
江茂叔濯纓而樂之築屋於其上用其平生所安樂蠶水而成名  
曰濂溪與之游者曰溪名未足以對茂叔之美雖然茂叔短於取  
名而惠於求志薄於徼福而厚於得民菲於奉身而燕及瑩縻陋  
於希世而尙友千古聞茂叔之餘風猶足以律貪則此溪之水配  
茂叔以永久所得多矣茂叔諱惇實避厚陵奉朝請名改惇頤二  
子壽燾皆好學承家求余作濂溪詩思詠潛德茂叔雖仕宦三十  
年而平生之志終在邱壑故余詩詞不及世故猶髣髴其音塵  
溪毛秀兮水清可飯羹兮濯纓不漁民利兮又何有於名絃琴兮  
觴酒寫溪聲兮延五老以爲壽蟬蛻塵埃兮玉雪自清聽潺湲兮

鑒澄明激貪兮敦薄非清蘊白鷗兮誰與同樂

津有舟兮蕩有蓮勝日兮與客就閒人聞拏首兮不知何處散髮  
醉高荷爲蓋兮倚芙蓉以當妓霜清冰寒兮舟著平沙八方同宇  
兮雲月爲家懷連城兮珮明月魚鳥親人兮野老同社而爭席白  
雲蒙頭兮與南山爲伍非夫人攘臂兮誰余敢侮

明月篇贈張文潛

黃庭堅

天地具美兮生此明月陞白虹兮貫朝日工師告余曰斯不可以  
爲佩棄捐櫝中兮三歲不會霜露下兮百草休抱此耿耿兮與日  
星遊山中兮招招耕而食兮無郵榛艾藜藜前吾牛兮痕不可  
更扶淺耕兮病歲深耕兮石嬰耜登山兮臨川雉得意兮魚樂小  
風兮吹波從其友兮尾尾日下兮川遊射雉兮喪余一矢佳人兮  
潔齊悵何所兮行媒南山有葛兮葛有本我羞鋪兮以君之鉏來

秋風三疊寄秦少游

邢居實

秋風夕起兮白露爲霜草木憔悴兮竊獨悲此眾芳明月皎皎兮

照空房晝日苦短兮夜未央有美一人兮天一方欲往從之兮路  
 渺茫登山無車兮涉水無航願言思子兮使我心傷  
 秋風淅淅兮雲冥冥鳴梟晝號兮蟋蟀夜鳴歲月徂邁兮忽如流  
 星少壯幾時兮老冉冉其相仍展轉反側兮從夜達明悵獨處此  
 兮誰適為情長歌激烈兮涕泣交零願言思子兮使我心忡  
 秋風浩蕩兮天宇高羣山逶迤兮溪谷寂寥登高望遠兮不自聊  
 駕言適野兮誰與遊遊空原無人兮四顧蕭條猿猴與伍兮麋鹿  
 為曹浮雲千里兮歸路遙願言思子兮使我心勞

華清宮詞五首

田晝

帝將汰兮般樂眩名山兮華薄羌誰為兮雲中眇殿兮戍削飛檐  
 兮轍轍繡栊兮錯稅颺壁門兮卸砌承桂柱兮璇跋梅有壇兮椒  
 有苑燠芳蓮兮水澹澹啼組岫兮晃朗建明珠兮直上彤樓兮綠  
 閣瑤壇兮羽幄犬羊兮西清鹿得名兮山客殷復殷兮夷城駕繚  
 復繚兮女墻下儼龍旌兮鳳蓋悅而明兮忽而曖與女獵兮河曲

金為羈兮玉為勒與女席兮天涯霓為裳兮羽為衣望夫君兮余  
 思樂不極兮告我以不歸悵千秋兮若此時不可兮屢得  
 有美一人兮心所歆被姣服兮織躡英朝與出遊兮夜忘歸山之  
 樊兮羅百司鉤膺兮陸續五貴般兮相屬沫灑駒兮鴛寶軸諸娣  
 從之兮兩大國犀屏兮象筵墮珥兮委鈿捐珠琲兮霧散哀蘭氣  
 兮寃延霞冠兮翠珮壑巾幘兮雲之際合眾豔兮儵煥轉清臚兮  
 流睇歛音兮眇眇芳塵兮縹縹騁秘樂兮天中播鐘虛兮夾陳龜  
 盤兮鞞鼓填篴高張兮紛絲絃而來下奄四海兮躡侈君之心兮  
 未已邑里移兮朝會遷光葳蕤兮列貂蟬顧文葆兮眉暈悄不愕  
 兮不言陳玉座兮金雞錫之帶兮十圍夫人自秉兮美質蹇何為  
 兮爾疑

浴芳華兮瑤池待夫人兮未來忽中變兮偃蹇拓九關兮洞開鬱  
 勃兮駭駭策駿駿兮奔螭縱鉦鼓兮蔽野戈鋌動兮拂霓操吾矛  
 兮反吾逐兵接脰兮車接轂帝順動兮將焉薄屠雲駒兮徹豐屋



龍轡兮華輶和鑾兮啾啾擁周衛兮失次旅旗紛兮九游臣鄰兮  
 嬪御任壤兮載路鈿扇兮綸翟魚須笏兮赤臆烏膽駕君兮逶遲  
 憑余怒兮不夷腕美人兮道曲悵羽袖兮襪襪朝馳鞅兮山阿夕  
 流憩兮江澗折瓊枝兮蕙萐將以遺兮無所歌汾寫兮悲秋風邑  
 邑兮余愁歎與爾兮目結心騷屑兮顧懷  
 天兵合兮讐羣兇銷氛沴兮奏膚公皇穆穆兮來歸盍將疑兮層  
 宮秋風兮颺颺紅實兮離離泯無人兮跡絕敞紫殿兮金扉霜滯  
 庭兮月侵墀蹇累愚兮失玻璃愴石溜兮激濯芳葩兮儼如昔錦  
 冕兮繡鶯思柔匹兮妍媸溟海阻兮太息魂之來兮秋之夕涕滢  
 滢兮增悲勅所思兮為余醫之解幃袂兮玉體謂芬馨兮可佩促  
 而袵兮原中遺而履兮行路覽故處兮猶疑徒丹楹兮延佇  
 秣余馬兮脂余車歲二月兮西南徂登朝元兮騁望興廢忽兮愁  
 予龍垆兮壘清川兮瀾瀾浮綠樹兮中天非雲非煙兮眇如薺  
 蔚豐壤兮氣冲融疇隴靜兮芳卉明灼袷服兮雅豔發組繪兮鮮

榮祥光兮繞繚虹霓迴氛兮海收潦軼咳語兮曾穹薄飛爨兮下  
 眺撫華清之巨麗兮熟轉踵而失之望秦陵之坡陁兮羌鬱鬱而  
 蔽之驪之山兮畢之原邱纍纍兮草芊芊諒前世兮俱盡余又悲  
 兮有唐

宋文鑑卷第三十

宋文鑑卷第三十一

詔

幸西京詔

盧多遜

祖宗升配詔

宋綬

賜中書門下詔

歐陽脩

皇太后還政議合行典禮詔

歐陽脩

通商茶法詔

歐陽脩

求直言詔

韓維

賜中書門下置寶文閣學士待制詔

張方平

禁內降詔

胡宿

立皇子詔

王珪

為雨災許言時政闕失詔

王珪

封太祖皇帝後詔

王珪

皇太后付中書門下還政書

王珪

太皇太后賜門下詔

蘇軾

太皇太后賜門下詔

蘇軾

合祭天地詔

范祖禹

元符日食求言詔

曾肇

賜夏國主詔

韓琦

賜觀文殿學士禮部尚書王舉正不允詔

歐陽脩

賜夏國主詔

歐陽脩

賜南平王李德政日曆詔

宋祁

賜判永興軍韓琦再乞相州不允詔

王安石

賜守司徒檢校太師兼侍中韓琦詔

王安石

賜富弼乞判汝州允詔

王安石

賜知亳州歐陽脩乞致仕不允詔二道

王安石

賜答曾公亮詔

王安石

賜特放知潭州燕度待罪詔

王安石

賜宰臣韓琦不赴文德殿立班待罪不允詔

王珪

賜河陽三城節度使兼侍中曾公亮乞免冊禮允詔

王珪

賜判亳州富弼乞罷使相不允詔

王珪

賜吳奎免恩命不允詔

王珪

戒諭夏國主詔

王珪

賜宰臣韓琦請郡不允詔

呂公著

賜王廣淵張詵獎諭詔

元絳

賜新除落致仕依前光祿大夫范鎮赴闕詔

蘇軾

賜尚書刑部侍郎范百祿乞外任不允詔

蘇軾

沿路賜奉安神宗皇帝御容禮儀使呂大防銀合茶藥詔

蘇軾

賜阿里骨詔

蘇軾

賜正議大夫知鄧州蔡確乞量移弟碩允詔

蘇軾

賜端明殿學士銀青光祿大夫致仕范鎮獎諭詔

蘇軾

賜觀文殿大學士集禧觀使蘇頌乞致仕不允詔

范祖禹

賜新除觀文殿大學士中太一宮使范純仁令赴闕供職詔

曾肇

幸西京詔

盧多遜

定鼎洛邑我之西都燔柴泰壇國之大事況削平江表底定南方  
惟率土之混同自上天之鑒祐內慙涼德感是洪休得不罄以恭  
虔申其告謝睠惟京而西顧兆陽位於南郊豆籩陳有楚之儀黍  
稷奉惟馨之薦朕今暫幸西京取四月內選日有事於圓丘宜令

有司各揚其職禮容儀衛典故在焉祇事肅成無或煩擾諸道州  
府不得以進奉為名輒有率斂凡在中外當體予懷

祖宗升配詔

宋 綬

朕聞王者奉宗廟貴功德禋天祀地則有侑神作主之尊審諦合  
食則有百世不遷之重朕以寡薄獲承天序實賴 先烈汔臻治  
平懼不能揚 祖宗之休丕顯懿鑠夙夜惟念弗遑寧居恭以  
太祖皇帝奮滄耀之精輯樂推之運屬五代澆季中華剖裂英威  
一震罔不率俾夷僭黜暴皇綱再張革其桀驁納諸軌度規摹閔  
遠詒萬世法 太宗皇帝躬盛聖之資乃膺繼體及來閩粵復汾  
晉方夏一統尉候萬里興文教拔羣材思皇政經憂勞庶務惠澤  
漸漬浹人骨髓 眞宗皇帝欽明孝熙恢纘鴻緒勤儉以率下哀  
矜以謹刑撫和二邊兵不復用民靡知役物遂其生因時昭泰憲  
章考古登封巡祭聲明焯耀享國多載仁恩溥博昔商周之際則  
長發大禘嚴父配天逮於漢氏亦能尊二宗立廟樂朕甚慕之肆

我 藝祖之受天命建大業可謂有功矣 二聖繼統重雍累洽  
可謂有德矣其令禮官稽按典籍辨崇配之序定二祧之位中書  
門下審加詳閱稱朕意焉

賜中書門下詔

歐陽脩

朕纘承丕基撫有方夏謂教之不可以家至而行之每務於身先  
惟是儉勤敢忘勉勵期與羣庶臻于富康而人始久安驕於佚欲  
物豐太盛耗以浮虛苟奉養以自私忘僭奢之爲戾士民交黷貴  
賤靡分惟其彊力之能無復等威之制考於著令雖有舊章顧在  
攸司鮮聞用法民遂安於常習弊罔革以滋深紀綱旣紊於度程  
風俗以至於流蕩俾朕有欲治之意不能副余之誠心而民多自  
陷之愚未免煩余之訓導夫令信由於貴始下化先於上行眷予  
一二之臣其率庶工而警職俾爾多方之眾勿踰常憲一作法以干  
刑庶漸革於侈風以其趨於治路凡居室之制器用之度冠服之  
章妾媵之數其令中外臣庶遵守前後條詔如有違犯仰御史臺

及開封府糾察聞奏其諸路州軍卽委轉運使提點刑獄臣寮及  
逐處長吏施行布告中外咸使聞知

皇太后還政議合行典禮詔

歐陽脩

朕頃以嗣承大統方執初喪過自摧傷遂嬰疾恙 皇太后尊居  
母道時邁家難閱余哀荒俯徇誠請勉同聽覽用適權宜賴保護  
之勤劬獲清明而康復恭惟坤德之至靜實厭事機之久煩殆此  
彌年荐承諄誨顧實繁於庶政難重挽於睿慈然而方國多虞則  
共濟天下之務惟時無事亦宜享天下之安先民有言無德不報  
雖日以三牲之養未足盡於予心而刑于四海之風必務先於孝  
治惟是事親之禮益存有國之規當極尊崇以稱朕意應合行儀  
範等事令中書門下樞密院參議以聞

通商茶法詔

歐陽脩

古者山澤之利與民共之故民足於下而君裕於上國家無事刑  
罰以清自唐末流始有茶禁上下規利垂二百年如聞比來爲患

益甚民被誅求之困日惟咨嗟官受濫惡之入歲以陳積私藏盜  
販犯者實繁嚴刑峻誅情所不忍使田閭不安其業商賈不通于  
行嗚呼若茲是於江湖間幅員數千里為陷窳以害吾民也朕心  
惻然念此久矣閒遣使者往就問之而皆謹然願弛權法歲入之  
課以時上官一二近臣件析其狀朕嘉覽于再猶若慊然又於歲  
輸裁成其數使得饒阜以相為生剗去禁條俾通商賈歷世之弊  
一旦以除著為經常弗復更制損上益下以休吾民尚慮喜於立  
異之人緣而為姦之黨妄陳奏議以惑官司必寅明刑用戒狂謬  
布告遐邇體朕意焉

求直言詔

韓維

朕涉道日淺晦于致治政失厥中以干陰陽之和乃自冬迄春旱  
暵為虐四海之內被災者廣閒詔有司損常膳避正殿冀以塞責  
消變歷日滋久未蒙休應嗷嗷下民大命近止中夜以興震悸靡  
寧永惟其咎未知攸出意者朕之聽納不得於理歟獄訟非其情  
朕志焉

賜中書門下置寶文閣學士待制詔

張方平

昔我 藝祖神武不殺誕昌寶祚 太宗修文德以光大業 眞  
宗崇儒術以承休命 仁宗善繼謨烈化成治定咸有述作煥于  
簡編河漢昭回奎璧相照迺規層構邃在西清上憲帝藏書之府  
章累朝稽古之盛並揭嘉名以登峻望俾服凝嚴之職因為咨訪  
之地誠聖哲之遠業熙洽之高致也 仁祖升遐 先皇纂御首  
命近列論次遺文鈿軸寶函未終繙錄白雲紫氣遽復上賓今告  
畢功甫將安奉大訓九歌之重垂世共長廣內祕室之藏貽謀無  
極祇循故事遙成先志寶文閣宜置學士待制著于令

禁內降詔

胡宿

朕紹承駿烈祗服先猷蹈道以臨庶邦慎憲而持大柄馭之子奪  
正以賞刑悉任至公靡容紊法比有儉幸肆興妄圖或違理覬恩  
或負罪希貸率求內出間亦奉行蠹政虧風莫斯為甚雖屢頒於  
詔約曾未絕於私祈兼慮臣庶之家近貴之列交通請託巧詐營  
為陰致貨賂密輸珍玩夤緣結納侵撓權綱方務澄清當嚴禁誥  
儻復違犯斷在必行重念成湯以六事責躬女謁苞苴之先戒管  
氏以四維正國禮義廉恥之具張矧宗祀之涓成屬祥釐之均被  
嘉與中外緹此非衰勉于自新以隆至治今後應內降指揮特與  
恩澤及原減罪犯者並仰中書樞密院并所承受官司具前後詔  
條執奏不得施行及臣庶家如有潛行貨賄結託貴近者並令御  
史諫官覺察論奏咨爾丞弼體朕意焉

立皇子詔

王珪

人道親親王者之所先務也蓋二帝之隆治繇茲出朕甚慕之右  
衛大將軍岳州團練使曙皇兄濮安懿王子猶朕之子也少鞠于

宮中而聰知仁賢見于夙成日者選于宗子近籍命以治宗正之  
事使使者數至其第迺崇執謙退久不受命朕默然有嘉焉朕蒙  
先帝遺德奉承聖業罔敢失墜夫立愛之道自親者始固可以厚  
天下之風而上以嚴夫宗廟也其以曙為皇子

為雨災許言時政闕失詔

王珪

蓋聞古之聖賢在位陰陽和風雨時日月光星辰靜黎民阜蕃以  
底休平朕甚慕之朕猥以眇身託於王公之上夙夜以思惟懼不  
能以承先帝鴻業而比年以來水潦為沴迺八月庚寅大雨京  
師室廬墊傷被溺者眾大田之稼害於有秋竊迹災變之來曾不  
虛發豈朕之不敏於德而不明於政歟將天下刑獄滯冤賦繇煩  
苦民有愁歎亡聊之聲以奸其順氣歟不然則何天戒之甚也今  
飭躬焦思欲銷復大異而未聞在位者之忠言進祈自新厥路何  
繇焉應中外臣僚並許上實封言時政闕失及當世之利病可以  
佐元元者悉心以陳毋有所諱執政大臣皆朕之股肱其協德交

修以輔朕之不逮

封太祖皇帝後詔

王珪

昔我藝祖皇帝之興以天發之期兵未始一血刃而卒再造區夏真大謀盛烈被諸萬世而莫高焉朕奉承聖緒夙夜不敢康乃顧後之子孫淺微弗顯而有司未嘗議封爵之文豈朕所以尊大統推親親之意哉且積厚者其流遠施大者其報豐宜令中書門下考大宗之籍以屬近而行尊者一人裂土地而王之使常從獻于郊廟世世勿復絕

皇太后付中書門下還政書

王珪

日者昊天不弔先帝上賓遽揚末命之言方結未亡之痛而皇帝踐祚之始銜哀過情忽傳詔於外廷請預聞於庶政載念承邦之重累申還辟之文皇衷未回羣聽猶鬱顧人子之誠雖至然國家之事靡安況日聽治朝躬發神明之斷出馳禁趨眾聞與馬之音百姓莫不交欣三靈以之薦祉吾嘗視前史之戒思彙聖之

圖將退飭於母儀庸進彊於君德從容房闥不亦美歟昨權同聽政事候皇帝康復日如舊去歲兩曾降手書還政輔臣等並於皇帝御前納下今來聖躬已安好其軍國事更不同處分故茲示諭宜體至懷

太皇太后賜門下詔

蘇軾

皇帝嗣位于茲四年華夷來同天地並應而皇太妃以恭儉之德鞠育之恩雖典冊以時奉行而情文疑有未稱皇帝以祖考之奉尊無二上而吾惟春秋之義母以子貴其推天下之養以慰人子之心宜下禮部太常寺討尋如於典故有褒崇未盡事件令子細開具聞奏

太皇太后賜門下詔

蘇軾

官冗之患所從來尚矣流弊之極實萃于今以闕計員至相倍蓰上有久閒失職之吏則下有受害無告之民故命大臣考求其本苟非裁損入流之數無以澄清取士之源吾今自以眇身率先天



下永惟臨御之始常勅有司蔭補私親舊無定限自惟薄德敢配前人己詔家庭之恩止從母后之比今當又損以示必行夫以先帝顧託之深天下責望之重苟有利於社稷吾無愛於髮膚矧此恩私實同毫末忠義之士當識此誠各忘內顧之心共成節約之制今後每遇聖節大禮生辰合得親屬恩澤並四分減一皇太后皇太妃准此

合祭天地詔

范祖禹

朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方丘特祭之儀蓋將補一代之闕容振百王之墜與朕惟菲德嗣守不基列聖已行謹當遵奉先朝未舉懼不克堪是以昔歲仲冬竭誠大祀神祇饗答祖考燕寧前詔有司載加集議猶欲咨度諸儒之論稽參六藝之文然理既不疑則事無可議

斷自朕志協于僉言祇率舊章永為成式今後南郊合祭天地依元祐七年例施行仍罷禮部集官詳議

元符日食求言詔

曾肇

朕以眇身始承天序任大責重罔知攸濟永惟四海之遠萬幾之煩豈予一人所能徧察必賴百辟卿士下及庶民敷奏以言輔予不逮矧太史前告天將動威日有食之期在正月變異甚鉅殆不虛生夙夜以思未燭厥理將以彌綸初政消弭天菑非藥石之規孰開朕聽況今周行之內人有所懷芻蕘之中言亦可採凡朕躬之闕失若左右之忠邪政令之否臧風俗之美惡朝廷之德澤有不下究閭閻之疾苦有不上聞咸聽直言母有忌諱朕方開讜正之路消壅蔽之風其於鯁論嘉謀唯恐不聞聞而行之唯恐不及其言可用朕則有賞言而失中朕不加罪朕言惟信非事空文尚悉乃心毋悼後害應中外臣僚以至民庶各許實封言事在京於合屬處投進在外許於所在州軍附遞以聞布告邇遐咸知朕意

賜夏國主詔

韓琦

昨以夏國累年以來數興兵甲侵犯疆陲驚擾人民誘迫熟戶去秋乃復直叩大順圍迫城寨焚燒村落抗敵官軍邊奏屢聞人情其憤羣臣皆謂夏國已違誓詔請行拒絕先皇帝務存含忍且詰端由庶觀逆順之情以決眾多之論逮此遜章之稟命已悲仙馭之上賓朕纂極云初包荒在念仰循先志俯諒乃誠既自省於前辜復顧堅於永好苟奏封所敘忠信無渝則恩禮所加歲時如舊安民保福不亦休哉

賜觀文殿學士禮部尚書王舉正不允詔

歐陽脩

夫朝廷之廣大賢雋之眾多必有幡然耆壽之臣以當上所優禮之異或事思所訪則有老成俾時之式瞻以為人望故禮雖七十猶有不得謝者焉卿懿文高行有君子之風清節令聞為當世所重閱書秘殿日侍清閑進讀經筵坐論道德固非有官司之責筋

力之勞宜思少安副我眷待

賜夏國主詔

歐陽脩

朕嗣守丕圖日新庶政方推大信以協萬邦思與藩屏之臣永遵帶礪之約矧勤王而述職固奕世以推誠而近年以來將命之使或不體朝廷之意罔循規矩之常多於臨時率爾改作既官司之有守致事體以難從且下脩奉上之儀本期效順而君有錫臣之寵所以隆恩豈宜一介於其間輒以多端而生事在國家之撫御固廓爾以無疑想忠孝之傾輸亦豈欲其如此故特申於旨諭諒深認於眷懷今後所遣使人更宜精擇不合妄舉以紊彝章所有押賜押伴使臣等亦已嚴行戒勵苟有違越必寘典刑載惟信誓之文炳若丹青之著事皆可守言貴弗違毋開閒隙之萌庶敦悠久之好

賜南平王李德政歷日詔

宋祁

願歷之義以初為常俾一天下之歸用謹人時之授以卿列壤南

裔率職本朝宣我恩化慰彼黎庶每屬歲元之會必榮廟朔之藏  
朕亦推處祿祥裁輔舒慘申命太史分次左方宜案象以奉行表  
布和之胥泊特茲馳錫勿怠欽承

賜判承興軍韓琦再乞相州不允詔

王安石

卿當國家之多難任社稷之至憂實能忠勤以濟勳績方均逸豫  
適此外虞煩我元功良非得已亦惟體國義不辭勞今雖尚謀經  
武之時非有蒐兵伐罪之事坐臨諸帥固可優游何必舊邦乃能  
休養勉綏居息以副倚毗

賜守司徒檢校太師兼侍中韓琦詔

王安石

便道之鎮朝廷故常來朝京師朕意所欲使事曲折既當聞知忠  
言嘉謨又所飢渴雖知勤勤可不勉哉

賜富弼乞判汝州允詔

王安石

比飭使人具宣至意就令賜告冀遂寧瘳卿嚴祇朕命不敢違息  
顧念吏卒閱其久留觸熱載馳用忘勤勤恭以事上卿實有之仁

及賤微又能如此忠誠所惻豈獨朕心從容小邦姑以養福勉綏  
吉祿母恤後艱

賜知亳州歐陽脩乞致仕不允詔二道

王安石

股肱名臣與國同體禮當得謝朕尚難之況年非告老之時而勳  
在受遺之籍不留屏輔人謂斯何姑體至懷少安厥位  
卿勳德之舊簡在帝心從容一州足以休養而抗奏至於四五必  
以田里為歸豈朕視遇故老有不足於卿乎何其求去之果也欲  
喻至意莫知所言惟能勉留實副勤佇

賜答曾公亮詔

王安石

昔裁變異以戒人君推之股肱朕所不敢元勳舊德實賴交脩謹  
告之來必緣象類明諭朕志使當天心庶幾君臣並受遐福不務  
出此而果於辭讓是惟保身豈曰謀國

賜特放知潭州燕度待罪詔

王安石

卿受命方隅助宣德化姦兇弗率乃觸大誅引慝自歸謂當譴黜

萬方有罪責在朕躬雖爾長民豈專任此

賜宰臣韓琦不赴文德殿立班待罪不允詔

王珪

天子之御正朝久而未講宰相之班百辟後亦從曩覽臺簡之忽陳規邦彝之侵略蓋延英賜對每喻中吳之咨故宣政留班不及大昕之謁矧在職之匪懈奚引愆而靡寧宜斥細嫌用綏素囑

賜河陽三城節度使兼侍中曾公亮乞免冊禮允詔

王珪

天子臨軒拜三公其禮舊矣今朕以上公之秩加于元臣方戒有司卜日而冊授之乃援比固辭不能為朕引絀廷下吁其禮何時而可復邪雖用勉從則匪朕心之懌

賜判亳州富弼乞罷使相不允詔

王珪

朕初臨丕基首撰大吏方勞精而其務忽引疾以屢辭去雖踰於歲年念不舍於朝夕適覽奏函之馭又將使袞之還且重祿所以

賦上賢樂郡所以優舊德宜收曲慮終保高名

賜吳奎免恩命不允詔

王珪

天子惟君萬邦建時百辟以祗迪于乃事矧曰左右之臣以朝夕承又乃辟予敢有弗欽爾克懋乃猷茲庸命爾圖厥政爾乃陳所以固辭朕命者三朕思有虞之世羣臣皆讓亦莫安厥位終勅之曰俞汝往哉爾弗遯聞于前人其率時訓惟厥中嗚呼慎爾止母倚乃身乃罔弗孚于休

戒諭夏國主詔

王珪

維乃祖考克有西土世為漢藩輔今爾弗蹈于前烈迺竊署重爵以奉幣於朝方邊吏拒還乃復稽留境上不及廷見之期洎朕親覽貢函而僭我王命實如所聞朕疑風俗荒遠未達朝廷之儀雖然棄信慢常誼不可長其務思先世之約以保綏于斯民母忽是圖以奸我有邦之罰今後所差使人即不得僭儗

賜宰臣韓琦請郡不允詔

呂公著

夫忘身徇國者前志之所高送往事居者人臣之所勉顧惟寡昧矧在亮陰永言負荷之艱實賴股肱之助荐披來奏頗異予聞謂已事於山園必聽辭於機柄雖末代或爾在本朝則無唯天聖之初馮拯去位非緣使領而獲罷蓋以疾疢之匪任卿體力素強望實兼劭所宜遺履謙之近節懋經國之遠圖深體至懷勉綏厥位

賜王廣淵張詵獎諭詔

元絳

洮岷之役師旅載興維予信臣一迺忠力百爾調發並濟厥須告凱奏功實繁攸助特加褒寵有腆分頒宜體眷懷益圖來効

賜新除落致仕依前光祿大夫范鎮赴闕詔

蘇軾

夫有德君子以精神折衝譬之麟鳳能服猛鷲朕虛懷前席以致諸老非敢必以事諉也苟得黃髮之叟皤然在位則朝廷尊嚴姦宄消伏卿雖篤老乃心王室母憚數舍之勞以副中外之望賜尚書刑部侍郎范百祿乞外任不允詔

成王命君陳商民在辟予曰辟爾惟勿辟予曰宥爾惟勿宥惟厥中古之有司與天子相可否蓋如此而況公卿之間議有異同而不盡其說哉例在中書與在有司固宜審處歸於至當而卿遂欲以此去位非古之道也其益修厥官以稱朕意

沿路賜奉安神宗皇帝御容禮儀使呂大防銀合茶藥詔

蘇軾

於赫神考如日在天雖光明無所不臨而躔次必有所舍肆予命爾祇奉此行禮既告成勤亦良至感慕之外嘉歎不忘

賜阿里骨詔

蘇軾

惟爾祖先世篤忠孝本與夏賊日尋干戈亦惟恃我朝廷爵秩之隆用能保爾子孫黎民之眾肆朕命爾嗣長乃師而承襲以來疆圉外擅爾弗能禁恣其所為遂據洮城以犯王略陰連夏賊約日盜邊朕憫屬羌之無辜出偏師而問罪元惡俘獲餘黨散亡山後

底平河南綏服朕惟率酋豪而捍疆場乃爾世功叛君父而從仇  
讐豈其本意庶能改過未忍加兵果因物以貢誠願洗心而效順  
爾既知悔朕復何求已指揮河路更不出兵及除已招納到部族  
外住罷招納依舊許般次往來買賣及上京進奉爾宜約束種類  
其保邊陲期寵祿於有終知大恩之難再勿使來款復爲虛言  
賜正議大夫知鄧州蔡確乞量移弟碩允詔

蘇軾

以義責備春秋有失教之譏以情內恕詩人有將母之念碩之得  
罪事在有司難以遺近之親而廢朝廷之典及觀來請有槩予心  
重違兄弟急難之詞以傷人子養親之意

賜端明殿學士銀青光祿大夫致仕范鎮獎諭詔

蘇軾

朕惟春秋之後禮樂先亡秦漢以來韶武僅在散樂工於河海之  
上往而不還聘先生於齊魯之間有莫能致魏晉以下曹鄴無譏

豈徒鄭衛之音已雜華戎之器閒有作者猶存典刑然銖黍之一  
差或宮商之易位惟我四朝之老獨知五降之非審聲音以律  
生尺覽詩書之來上閱箕虞之在廷君臣同觀父老太息方詔學  
士大夫論其法工師有司考其聲上追先帝移風易俗之心下  
慰老臣愛君憂國之志究觀所作嘉歎不忘

賜觀文殿大學士集禧觀使蘇頌乞致仕不允詔

范祖禹

祖宗以來貴德尚齒鼎槐之老莫不眷留班于大廷表儀百辟卿  
向繇省轄進涖宰司深執勞謙懇求去位置使祠館勉徇雅懷已  
退處於邱園尙何殊於田里矧卿筋力克壯聰明不衰中外所瞻  
足以重國體茲至意無或費辭

賜新除觀文殿大學士中太一宮使范純仁令赴闕供職

曾肇

卿三朝元老四海具瞻出處爲邦國之重輕用舍繫仁賢之消長

久置散地宜還本朝俾陟降於殿帷仍總司於琳館豈惟尊德尚  
齒昭示寵優庶幾鯁論嘉謨日聞忠告昔周公已老猶在京師留  
侯雖病不去漢室眷惟舊弼異世同心聞命疾馳副朕所望

宋文鑑卷第三十一終

宋文鑑卷第三十二

敕

頒貢舉條制敕

歐陽修

賜右屯衛大將軍叔韶獎諭敕

歐陽修

賜陝西西路沿邊經略招討都部署司敕

宋祁

罷諸路同提點刑獄使臣置轉運判官敕

劉敞

復天下州縣官職田敕

張方平

條制資廩敕

張方平

皇族出官敕

蘇頌

赦文

建隆登極赦文

嘉祐明堂赦文

王珪

治平立皇太子赦文

王珪

熙寧七年南郊赦文

元絳

冊  
元豐立皇太子赦文

鄧潤甫

乾德上尊號冊文

范質

封祀玉牒文

尊皇太后冊文

歐陽修

皇后冊文

王安石

仁宗皇帝加上徽號冊文

王珪

立夏國主冊文

王珪

皇后冊文

李清臣

仁宗皇帝哀冊文

韓琦

宣仁聖烈皇后哀冊文

畢仲游

欽聖憲肅皇后哀冊文

李清臣

敕

頒貢舉條制敕

歐陽修

夫儒者通天地人之理而兼明古今治亂之源可謂博矣然學者不得騁其說而有司務先聲病章句以牽拘之則吾豪雋奇偉之士何以奮焉有純明朴茂之美而無敦學養成之法飭身勵節者使與不肖之人雜而並進則夫懿德敏行之賢何以見焉此士人之甚弊而學者自以為患議者屢以為言朕慎於改更比令詳酌仍詔宰府加之參定皆以謂本學校以教之然後可求其行實先策論則辨理者可盡其說簡程式則閱博者可見其材至於經術之家稍增新制兼行舊式以勉中人其煩法細文一皆罷去明其賞罰俾各勸焉如此則待士之意周取人之道廣夫遇人以薄者不可責其厚今朕建學興善以尊子大夫之行而更制革弊以盡學者之材子於教育之方勤亦至矣有司其務嚴訓道精察舉以稱朕意學者其思進德修業以無失其時凡所科條可為永制

賜右屯衛大將軍叔韶獎諭敕

歐陽修

朕固嘉汝嚮學勵善蔚然而有文與夫習富貴之驕而樂狗馬之



玩者異矣然夫學者所以知君臣父子之禮出可以施於國入可以施於家汝其慎擇厥師講救其闕使言而無過以自遠於悔尤夫能異於眾人誠爲有立必至乎君子然後大成汝其勉之無或中止

賜陝西西路沿邊經略招討都部署司敕

宋 祁

朕卹軍旅之苦寵邊陲之良事從優寬情無遴愛至于常愆細過並許功除煩文苛法罕由吏議昨滕宗諒張亢並緣事任合給公用庫錢俾其宴享賓僚犒飭軍伍而乃用度無藝簿領失防陽託貿營潛有牟入攸司言上遣使卽推如聞逮繫頗多鞠劾彌廣本其冗費寧足深誅已罷案窮悉合原貸其滕宗諒等止免一官量降差遣雖屈吾法期慰士心且夫盡用市租美推趙將來從我取誼表漢臣每慕前風大體尙慮諸道帥守便以茲事爲懲或損狹餼牽或裁量藥餌苟存畏避謂免譏彈胡益至公亦非朕意但當

循經費之式去自潤之私取仰於官均惠於眾由茲底績夫何閒然安節坦懷毋或疑憚

罷諸路同提點刑獄使臣置轉運判官敕

劉 敞

國家兼覆寓內疆理天下分州立邑十有八路惟吏之不平民之失職政之頗類獄之糾紛未能獨察也故設糾虔之司使奉欽恤之寄專屬朝案貳以武吏誠欲審疑察枉釋冤決滯納民於不寃流化於無訟而武吏或起世家或由軍功文墨期會未必深究監司背項適增其繁夫非其習而望其效違其方而冀其功不亦難乎其罷諸路同提點刑獄使臣令樞密院勘會已及二年者卽令赴闕未及二年者與就移合入差遣及於河北河東陝西緣邊兵馬多處相度添置路分都監以次補用庶幾人盡所長官不虛受夫轉運使之任所寄耳目治財賦集事功也江南東西荆湖南北廣南東西福建益梓利夔等十一路此其去京師遠者萬里近者

數千里或跨帶山海崎嶇蠻夷而皆一員主之處則無與參慮出則無與僇力設有緩急之警調輸之煩機會一失民受其敝甚非豫慮先事之策其各增置轉運判官一員以三年爲一任選差第二任以上知州資序人候一任滿日與提點刑獄差遣初入知州及第二任通判資序人候滿兩任日與提點刑獄差遣若居部無狀隳職敗事亦重行其罰蓋士常患任之不當其材無以見長用之不久其任無以就功今朕別異文武使得自試選擢賢能使得次進吾於士大夫可謂無負矣其各竭力悉心勉成功名布告中外咸諭朕意

復天下州縣官職田敕

張方平

昔在先帝詔復公田合王制班祿之差得聖人養賢之義載原深旨本自愛民比者縉紳之間屢陳利害之意以謂郡縣受地有無不齊銓審除員權利爲倖辨競以之傷俗因緣至于害人故嘗命官斷以定數誠足釐於浮弊然未安於予懷禮不云乎厚祿以勸羣臣則下之報禮重凡厥文武仕于朝廷雖廉素者惟士之常而富貴者人之所欲其全寬大之體自有公平之制所宜給其所未給均其所未均約爲等差概令增足使事父母者得以致其養畜妻子者得以致其樂冠昏喪祭有所奉慶恤饋問有所施不牽私室之憂必專公家之慮則六計可以弊羣吏之治四方可以期眾職之修儻自犯于有司亦何道於彝憲上廣先朝之惠示不敢渝下俾諸臣之言審茲自定惟爾中外體予所存

條制資廩敕

張方平

周禮大司樂掌學政以六藝教郡國子漢制光祿勳典任籍以四行察三署郎茲其官材本於世胄然當辨論必屬俊良今廩法之所原古典刑之是憲惟因循之日久寢滋蔓而倖多敝生作法之涼濫起推恩之過且賞延于世諒非及於疏宗官惟其人顧何取乎髫稚暨階仕進之路復無誨育之科室不茨墉田不疆畝處不裕立身之道出不閑從政之方略觀貴途良鮮舊族此則上因朝

廷法制之不立下自父兄訓義之不孚故俾宰司詳為定令使夫  
冢嗣先錄以篤為後之體支子限年以明入官之重設考藝之格  
激之向學立保行之條勉令率履前史不云爵祿者天下之砥石  
人君所以礪世磨鈍茲實用焉庶乎位有稱職之才朝多濟世之  
美非惟為國造士是乃為臣立家咨爾具僚知朕此指

皇族出官敕

蘇頌

自我祖宗惇敘邦族大則疏封於爵士次則通籍於閭臺普集  
京師參奉朝請然而世緒浸遠皇枝益蕃屬有親疏則恩有隆殺  
才有賢否則祿有重輕今而一貫於周行是亦奚分於流別雖睦  
嫻之道誠廣而德施之義未周故廷臣數言宰司繼請謂宜定正  
限以等彝朕惟親戚之間經史有訓漢唐之世典故具存或以九  
族辨尊卑或以五宗紀遠近或聽推恩而分子弟或許自試而效  
才能或宗子之賢得從科舉或諸王之女自主昏姻盡前世之所  
行顧當今之未備況我朝制作動法先王豈宗室等衰反無定著

因俾羣公之合議將為一代之通規載攬奏封具陳條目以謂祖  
宗昭穆宜從世世之封王公子孫抑有親親之義若乃服屬之既  
竭泊于才藝之並優在隨器以甄揚使當官而勉懋至於任子之  
令通昏之儀凡曰有司之常一用外官之法僉言既允朕意何疑  
告於將來遂頒明命噫自義率祖既殊升降之文因時制宜斯盡  
變通之利咨爾宗盟之眾固多博識之倫奉承新書當體朕意

赦文

建隆登極赦文

五運推移上帝於焉睠命三靈改卜王者所以膺圖朕起自側微  
備嘗艱苦當周邦草昧從二帝以徂征洎虞舜陟方翊嗣君而纂  
位但罄一心而事上敢期百姓之與能屬以北虜侵疆邊民罹苦  
朕長驅禁旅往殄胡塵鼓旗纔出於國門將校共推於天命迫迴  
京闕欣戴眇躬幼主以歷數有歸尋行禪讓兆民不可以無主萬  
機不可以曠時勉徇羣心已登大寶昔湯武革命發大號以順人

唐漢開基因始封而建國宜國號大宋改周顯德七年爲建隆元年乘時撫運既叶於謳謠及物推恩宜周於華夏可大赦天下於戲革故鼎新景命初隆於王室眚災肆赦鴻恩普洽於民心更賴將相王公協謀同力共裨寡昧以致升平凡爾萬方咸知朕意

嘉祐明堂赦文

王珪

朕承三聖之基履四海之貴深惟持國之日久益念爲君之道藉有臨聽之瘡庶以圖天下之佚無奉養之靡庶以資天下之豐兢兢萬務之維微勉勉前事之所戒倚以左右輔弼之正予敢有弗欽事于上下神祇之明予敢有弗肅屬九穀登富三辰昭華象來桂海之祥塵絕玉關之警有邦之應於朕豈功恭念爲天子者必修報本之禮爲人之子者必懷追養之慕重循菲德屢緝曠文頃按明堂之圖古如路寢之制載經斯室載度斯筵直大火之駢芒乘季秋之肅氣物無上帝之稱非躬祠不足昭虔聖維文考之尊非嚴配不足盡虔孝於時備法物之駕服大冕之章格靈祝

於真庭款清德於太宇還祇宗祀之舉具飭純誠之將迺神光陸離燭于薦鬯之夕喜氣休晏被于燎柴之時亶不事之繼成敢蕃釐之專鄉宜孚廷渙以契天心可大赦天下於戲承神之胙旣均輝耀之微盪俗之瑕復若風霆之布蓋禮鉅則擇之博孝至則勸以遐尙賴秉文之英經武之傑厲同寅於王室壯大治於邦圖其荷無疆之休亦膺無窮之聞

治平立皇太子赦文

王珪

王者承天立極莫不思長世之圖爲國建儲所以正萬邦之本故朕親先父子而天下皆以爲愛命發朝廷而天下不以爲私粵予上嗣之良稟自日躋之聖出而就傅寢窮學肆之聞入則承顏勤至寢門之問比疏榮於王社益侈德於天枝顧荷丕基之艱猶虛正體之貳矧漢文命嫡著於卽祚之初年且夏后立子期以傳家於萬世維羣元之所俟維大器之所承式符少海之祥宜踐東朝之位肆顯冊之不發嘉僉言之大同爰契歡心用覃曠澤可大赦

天下於戲文昭武穆夙詒燕後之謀震長離明本有承華之象蓋  
義重虜先者禮必亟舉慶施虜上則惠必遐流咨爾庶方當體朕  
意

熙寧七年南郊大赦

元絳

王者欽崇神天嚴奉宗祏就郊以饗所以詔天下之恭假廟而烝  
所以教天下之孝洪惟五聖之烈誕輯百王之文肆予冲人昭事  
上帝載念物無以稱維一誠可以展大報之儀祭不欲煩維三歲  
可以述躬行之典協會康年之順道迎至日之長是用朝薦殊建  
裸將太室乃進登於陽時以哀對於皇穹合祛柔祗陟配文祖祝  
燧告絜贊犧尙純六樂變音舞奏而諸物至二精揚燎煙升而萬  
靈交方丕事之獲成敢蕃禧之專饗宜敷大號以賚多邦可大赦  
天下於戲意盡精禋既秩宗祈之舉政施惠術宣昭慶宥之行維  
時黎元綏我德澤尙賴謨明四近忠蓋羣材儀圖新策勸相  
隆平之運同底于治永孚厥休

元豐立皇太子赦文

鄧潤甫

父子一體也惟立長可以圖萬世之安國家大器也惟建儲可以  
係四海之望位序蚤定而人莫不以為悅典禮亟崇而眾罔敢以  
為私永惟上嗣之賢實有妙齡之譽入而視膳孝友見於夙成出  
則好書聰哲繇於自得粵紹休於正統猶虛位於東朝迺考著龜  
之占迺稽方冊之實載涓吉日肇闢青宮周家先親不敢忘廟社  
之重夏后與子蓋以順天人之心宜覃曠恩徧暨羣品可大赦天  
下於戲離明震長繇帝緒於億年解吉渙亨灑天仁於萬物蓋禮  
之所行者大則澤之所流者深咨爾多方體朕至意

冊

乾德上尊號冊文

范質

維乾德元年歲次癸亥十一月己酉朔十六日甲子攝太尉守司  
徒兼侍中蕭國公臣質守司空平章事臣溥尙書右僕射平章事  
臣仁浦及內文武臣寮馬步諸軍將校藩郡守臣四夷君長緇

黃耆艾等七千五百人謹再拜稽首上言曰惟天爲大惟堯則之  
又曰舜有天下無爲而理是以古之言道德者莫先於二帝一則  
曰聰明文思一則曰溫恭濟哲英聲茂實意無欲而自彰景福鴻  
休心無求而自至巍巍蕩蕩無得而言伏惟皇帝陛下高明博厚  
宣慈惠和純粹之德全孝友之行著惟精惟一知微知章向者龍  
尚處於潛淵日未離於暘谷歷試之際志在扶危險阻艱難何往  
不濟躍馬蹈高平之陣麾戈佐淮甸之征喋血塵兵一月三捷勞  
旋飲至論功莫二洎乎天監厥德用集大命人祇叶應風雨咸若  
鼎運初建國步猶梗始則李筠犯順長戟指闕并人連禍寇我北  
鄙於是以太行之行重進怙亂弃德崇姦幅員千里生民被毒於  
是有廣陵之役千乘萬騎如霆如雷詢彼仇方震疊區宇翠華宵  
至堅城旦下連平二孽有同符契累朝已來出師誅暴未有若茲  
之奇速也頃者華風不競中國政微五嶺三江置諸度外殊文異  
軌六紀于茲肇啟聖謀驅攘寇亂荆湖底定南土晏然燕薊之戎

汾晉之孽燕巢幕上朝不謀夕邊事少閒理道無壅嚴恭寅畏一  
日萬幾勤於已而泰於人儉於躬而豐於物明四目而高視達四  
聰而遠聽不侮鰥寡恤天窮也信及豚魚遂物性也惜力念耕耘  
之苦推食閔介冑之勞法家之流旣峻且密乃詔大理重正刑名  
俾盡哀矜務從寬簡減盜竊之罪緩鹽麴之禁好生之德通於神  
明若乃味爽不顯坐而待旦商湯之戒慎也側身損己長轡遠馭  
漢文之化導也循名責實信賞必罰建武之法制也果敢決斷從  
善如流貞觀之風烈也帝王之道於茲備矣太平之業於茲成矣  
於是祇見清廟致其孝享圓丘展禮對越上玄一獻而天帝降祉  
再獻而神人以和三獻而萬祿攸報祥風拂袂休氣繞壇熙熙怡  
怡羣心胥悅國家大慶眾庶共之肆赦覃恩俾民更始與天合道  
謂之應天大無不覆謂之廣遠無不至謂之運博施濟眾謂之仁  
智周萬物謂之聖化成天下謂之文保大定功謂之武其德無際  
謂之至德臣等不勝大願謹奉玉冊玉寶上尊號曰應天廣運仁

聖文武至德皇帝伏惟垂日月之明監億兆之情凝旒端委昭受鴻名如山嶽之固如松柏之貞乾健不息品物咸亨承天之祐萬壽千齡

封祀玉牒文

維大中祥符元年歲次戊申十月戊子朔二十四日辛亥有宋嗣天子臣敢昭告于昊天上帝啟運大同惟宋受命太祖開階功成治定太宗膺圖重熙累盛粵以冲人不承列聖寅恭奉天憂勞聽政一紀于茲四隩來暨玄貺殊尤禎符章示儲慶發祥清淨可致時和年豐羣生咸遂爰荷顧懷敢忘繼志僉議大封聿伸昭事躬陟喬嶽越對上玄率禮祇肅備物吉蠲以仁守位以孝奉先祈福逮下侑神昭德惠綏黎元懋建皇極天祿無疆靈休允迪萬乘其昌永保純錫

尊皇太后冊文

歐陽修

維治平二年歲次乙巳十一月丁巳朔十有六日壬申嗣皇帝臣

曙謹稽首再拜言曰臣聞昔者明王之以孝治天下者非家至而日見也蓋有要道焉推所以行於己者為天下率盡所以奉其親者為天下先而四海靡然而承風矣洪惟有宋受命造邦百年四聖而小子獲承之以繼我仁考之遺休餘烈方與羣公卿士夙夜以思勉其不逮庶幾如我仁考付畀之意以申罔極欲報之心此固慄慄祇懼不敢違寧者也顧惟眇末之質提攜鞠育慈仁咻煦至于有成自我聖母嗣位之始哀迷在疚而憂勤艱難一日萬務協和綏靖保祐扶持功施邦家亦惟我聖母永惟至恩大德無物可稱是以稽參典禮率籲羣心合志一辭懇懇惓惓不勝大願謹遣攝太尉具官韓琦司徒具官胡宿奉玉冊金寶上尊號曰皇太后恭惟皇太后聖善明哲柔閑靜專粵自正位中宮內助先帝陰禮修而教行儉德著而下化遂及萬國先於正家逮夫玉几受遺遭時多難勉徇勤請權同聽決而明識遠慮動懷謙畏深鑒漢家母后之失訖不踐於外朝及歸政冲人合於易

之進退不失其正之聖是惟全節鉅美固已超出前古而垂法後世宜乎盛烈播于聲詩尊名光於典冊惟末小子獲奉溫清嗚呼殫九州之富以爲養未足盡於孝心享萬壽之福而無疆期永承於慈訓臣誠懼誠抃稽首再拜謹言

皇后冊文

王安石

維熙寧二年歲次己酉四月丁酉朔二十六日壬戌皇帝若曰自昔有天下必擇建厥配以承宗廟以御家邦肆朕受命奉循前烈考慎典冊以祈協于神民咨爾向氏懿柔淑恭舊有顯聞肇功唯祖彌亮帝室流德之澤覃延後嗣是產碩媛比賢姜任越朕初載來嬪蕃邸盟饋在中率禮無違以至嗣服祗承內事齋明夙夜罔有曠失宜崇位號表正宮庭今遣攝太尉雅忠協謀同德佐理功臣樞密使光祿大夫檢校太傅行尚書刑部侍郎上柱國東平郡開國公食邑五千戶食實封一千戶呂公弼攝司徒朝散大夫右諫議大夫參知政事護軍太原郡開國公侯食邑一千一百戶賜

紫金魚袋王珪持節冊命爾爲皇后夫惟興釐厥士女咸自內始達于四海朕克勤人用弗怠朕克儉人用弗奢朕克正人用無取側頗僻爾勤相朕乃濟登茲於戲匪初惟艱惟慎厥終爾忱念茲朕以永享天祿爾亦豫有無疆之福豈不韙哉

仁宗皇帝加上徽號冊文

王珪

維元豐六年歲次癸亥十一月壬寅朔二日癸卯孝孫嗣皇帝臣謹再拜稽首言曰臣伏觀古先格王莫不大名發於前而大惠昭於後其法皆本於至公而不可易至後世臣子又欲盡報上之道以謂君德甚盛其言不足以包眾美於是至郊加誅之文夫欲推事存之禮述追遠之志則奉素享之榮號益新紀之鴻烈謀羣公請太室洋洋庠際天接地而震顯之不亦當靈心而傳古誼乎恭惟 仁宗神文武明孝皇帝躬清明之資賦神睿之略乾行施之不息仁性根於自然時乘六飛端御大器知窮八荒而不見其迹澤及萬彙而不居其功爾乃簡拔峻賢放遠邪佞宥恕刑獄



懷保鰥寡賞不徇所私罰必當于理興農桑之本務緝禮樂之墜  
文有慘怛好生之心吏或誤入重辟必終身見斥有寬裕從諫之  
度言者屢進狂直必曲意見容念兵革之傷夷則不殺而服念稼  
穡之勤勞則罔寧于勉矧履天下之尊而持之以抑畏饗天下之  
富而寶之以儉素與馬不聞於游盤鍾鼓不涉於閒燕宮室亡奢  
靡之飾器服亡瓌奇之玩加以夙夜齊栗事天之誠盡霜露怵惕  
念親之感深方朝廷之久安迺大革因循而聖政又新爲社稷之  
重計迺前定禍亂而皇嗣蚤立故四十二年仁恩川流涵濡薰蒸  
格于上下日月華風雨均四時餘百穀蕃北有獷狁而不能驕西  
有點羌而不能軼蟲魚遂性自安川藪之游男女潔誠更趨耕織  
之樂固有幽遐荒昧之俗不約而予來奇偉倜儻之瑞不剏而特  
見者矣丕赫哉憲度鴻明聲文沛施自載籍之傳蓋未有休功盛  
業可加于茲也重循涼菲永念猷訓今將款清廟陟紫壇遂受厚  
福以浸黎元宜於此時臨彤庭發玉版上不敢隳祖宗之典下不

敢虧神民之情如堯如舜如禹如湯豈不高一世之聞而流萬世  
之聲哉爰飭上儀載揚景鑠謹遣銀青光祿大夫守尚書左僕射  
兼門下侍郎上柱國太原郡開國公食邑七千六百戶食實封二  
千五百戶王珪奉玉冊玉寶加上徽號曰仁宗體天法道極功全  
德神文聖武睿哲明孝皇帝恭惟明德在天臨受徽稱維億萬年  
永錫嘉祉謹言

立夏國主冊文

王珪

維熙寧二年歲次己酉三月戊辰朔十四日辛巳皇帝若曰於戲  
昔堯合萬邦而民風和周建列土而王業楙若古申命蓋國家之  
成法也咨爾秉常迪性純壹飭躬靖虔生稟山川之靈舊傳弓鉞  
之賜撫有西夏尊于本朝知事君必盡其節知守國當保其眾乃  
內發誠素外孚誓言質之天地而不欺要之日月而不昧朕用稽  
酌故典表顯徽實錫爾以茅土之封不爲不寵加爾以車服之數  
不爲不榮涓辰旣良備物旣渥誕舉丕冊以華一方今遣朝奉郎

守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百戶劉愨持節冊命爾爲夏國主爲宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祇予一人之彝訓可不慎歟

皇后冊文

李清臣

皇帝若曰天相予祖宗茲歷世寧康朕旣敬紹丕緒罔作麗觀底信內外惟式斬以正邦今左右弼臣禮儀正貳暨族老宗婦各虔厥事成鋪繹舊聞明敷于位曰乾施坤承日照月儷四時不忒萬物用成盍稽則象詢考卜筮若時元吉正名錫服俾長首六宮以母天下予惟國有故常是何敢弗率咨爾王氏乃祖忠勞王家書于太史子孫公侯出入藩服惟功澤逮茲是碩媛淑嫵溫恭備有嘉德聘歸王邸入承事皇姑靡不若禮上天右序予家蚤育元子慶在宗廟惠賚于四方乃以某年某月某日遣攝太尉具官某

攝司徒具官某賜爾皇后之寶方寸有半文盃螭紐授之玉冊厥簡五十命爾翟衣笄纒博鬢黼領大帶以朝暨歲時將祀于東西宮金輿朱蓋武賁禁衛步障行導是惟顯哉爾其克后職思后道履中體順茲日饗多福集大祐于厥躬其尚飲助于治昭聞于無窮於戲懋戒之哉

仁宗皇帝哀冊文

韓琦

維嘉祐八年歲次癸卯三月癸卯朔二十九日辛未仁宗神文聖武明孝皇帝崩于福寧殿旋殯于殿之西階粵十月戊辰朔六日癸酉遷座于永昭陵禮也龍馭賓天珠襦留殯萬方之軌同臻七月之期茲近法仗已嚴靈輜未進風雲慘鬱以生悲臣妾涕號而思殉孝子嗣皇帝臣曙接統承堯念親晞舜徘徊象物驚禁從以如存推慕仙游致哀誠兮必盡繫臨奠以長辭蓋終天之永恨乃命弼臣以文傳信其詞曰  
惟宋受命與天無疆藝祖以武底寧四方神宗以文萬邦一王真

廟紹隆赫然其光逮夫仁宗益熾而昌厥生之初上帝惟祐天日  
之表振古未覩色出圭璋步嚴龍虎其俾真人來綏下土元良之  
建七鬯是主寢門之問惕若文武嗣訓之循纂承丕緒左右獻言  
以蒙自處大運歸乾獨化陶甄進良黜姦始章聖權其仁如天其  
度如淵其仁伊何得之自然草秀而茁蟲飛而翾尚不忍傷況吾  
民焉惠澤之霈滂洋幅員物無不滋四十二年猗如天兮化功則  
全其度伊何汪然莫際巨細必容默分誠偽臣在言職不知諱忌  
時肆詆訐眾嫉狂易聖心怡然曰此忠義是也吾從過焉何戾猗  
如淵兮是能致治明慎庶獄極于哀矜惟法所在未嘗變刑郡邑  
之吏責之詳平一失入罪無階顯榮尊為天子以儉為貴崇尚清  
虛屏斥紛麗向緣不懌輔臣入視殿幄蕭然茵衾故敝率用繪素  
了無文綺眾口驚嗟上曰何喟吾之受用素止如是此民膏血烏  
敢妄費恭事天地孝承祖宗九見圓丘再祇合宮大禴于廟親藉  
于東服器精備粢盛潔豐小次不御秉圭顒顒何必戶曉民胥偃

風取士之路務存至公十二臨軒策之必躬雋髦盡得巖穴幾空  
有將有相曰功曰庸眇視三代吾其比崇北胡之強西夏之獯時  
欲跳梁恣其貪嗜吾以威懷折其凶銳兩皆搖尾從我羈餌百蠻  
梯航琛賫日至禮樂具修干戈不試夫惟立嗣天下之基前世令  
王或牽以私事不前定濱于亂危我出獨斷挺然不疑求賢于宗  
唯聖是知神器之重其傳有歸廟社以安生靈以嬉迹其大公堯  
舜之為昔在人上必以偏好或樂馳逐或喜征討或務宴游或專  
營造或邇聲色或泥丹竈基弈之工擊拂之妙有一于此下從而  
效噫吾仁宗澹無所樂曰吾好者在勤政道日必盱昃惟先之紹  
開時弄翰或隸或草聖帚之揮千奇萬巧去冬之暮清燕之閒再  
闢天閣詔呼從官親作飛白侍臣縱觀心合造化生成筆端書幅  
踰百大均寵頌退坐羣王行觴盡歡嗚呼哀哉賜墨尙濕宸章未  
刊植璧斯虔遽有金滕之禱綴衣遂徹俄承玉几之言嗚呼哀哉  
大變之來天傾地裂四海之慟風號雨血兆民震駭其無生百辟

冤乎而僅絕乘雲之游兮汗漫而自高持髯之慕兮僵仆而徒切  
 因疑前會之非常似與羣臣之敘訣嗚呼哀哉候律云凜諷辰協  
 元嚴蜃路以方駕視羽幢兮始前池竹搖雉車旗飾鸞背朱翟之  
 通達指青龍之古山關路長兮去復去宮車晚兮還不還痛徹六  
 宮兮莫如逝淚灑重瞳兮胡可攀嗚呼哀哉寒日晝昏愁陰夜積  
 卷晴霓於丹旒蕩霜波於素帟悲笳互咽六州之奏增悽駿嶽前  
 瞻萬歲之聲何聞大隧一扁幽堂永寂人閒之恨空長帝所之歡  
 豈極嗚呼哀哉秦漢而下御邦子民夔越三紀纔聞數君其閒治  
 亂以相駁否亨之不醇如仁宗享國之久而始終太平兮彼安敢  
 望吾之清塵生而無窮者厚載健而不息者高旻惟至仁盛德與  
 高厚之俱兮萬世巍然而不泯嗚呼哀哉

宣仁聖烈皇后哀冊文

代宰相

畢仲游

維大宋元祐八年歲次壬申九月三日癸酉大行皇太后崩于壽  
 康殿旋殯于崇政殿之西階粵明年正月遷祔座于永厚陵禮也

叢殿帟空祖庭燎暎雲似卻而復凝月雖輝而如慘孝孫嗣皇帝  
 臣煦臨遺奠以興哀瞻振容而永慕鳳吟管以何悲龍挾輔而若  
 駐羽衛羅闕神儀布露爰制近司紀陳聖度其詞曰

皇矣大宋寶命自天重明累聖跨成軼宣正后在中契于坤乾較  
 任比姒亦逾于前有系自姜源深積厚功熙我朝方虎是偶奄韓  
 宅魯益昌厥後月瑞日符是興太母於鑠太母躬義率仁居靜猶  
 地含和如春正素自稟聰明夙聞作合英祖齊昇並曜受養神考  
 陰功善教體道不違惟德是倣元豐末命帝命惟辟聽斷勉同以  
 補天隙擁佑神孫立民之極恭以勵人儉惟化俗衣有大練奩無  
 片玉房闈不出四海在目信義由中九夷思服如鑑不塵如璞不  
 緇三事大夫正直是咨宗藩外戚滲漉惠慈人爵王官雖卑不私  
 廟謁靡行外朝靡踐池籩靡臨惟正是勉服御靡更惟惡是善庸  
 爾萬方為則為典左右皇躬動有壇宇居由範防造次于是寢隆  
 且昌如天清明霽日之光治化方成憂勞亦至外若平居中潛邁

厲坤軸軋以夜摧月輪翩而曉墜守大化之靡怛尙斯民之爲意  
嗚呼哀哉珠箔低垂兮雲霧猶隔蕙帳髮鬢兮爐煙未銷想仙馭  
以何適謝人寰而已遙萬乘號慟哀纏九霄千官縞素雨泣東朝  
嗚呼哀哉人與神兮變何速秋復春兮時以徂犧樽盈兮未忘於  
平昔池綽動兮難留於須臾翼八翼以爲衛陳六衣而泥塗嗚呼  
哀哉野蒼茫兮人漸遠仗徘徊兮天欲晚遡洛澗兮嗟備物之如  
在逾鞏岸兮知神遊之不返山川已兆於眞宅松柏猶凝於故苑  
嗚呼哀哉玉晦龍蟄金藏鑑昏泉關掩夜宮闈泣晨車軌同兮雖  
來於萬國寶座閒兮惟朝於百神魚惟炬以非日雁長飛而不春  
嗚呼哀哉成內則於三朝貽素風於十祀致理之勤兮今已往大  
道之公兮古如此何遠其家以爲國而憂其民之猶子宜大書而  
作冊俾永光於宋史嗚呼哀哉

欽聖憲肅皇后哀冊文

李清臣

粵建中靖國元年辛巳歲正月壬戌朔十三日甲戌大行皇太后

崩于慈德殿二月壬辰朔十一日壬寅殯于西階以三月壬戌朔  
八日己巳戒百官請命於太廟諡曰欽聖憲肅皇后太史箴之將  
以五月辛酉朔六日丙寅遷座于永裕陵禮也哀子嗣皇帝臣倍  
極永感之懷寫無窮之慕躬薦洞酌奉靈輶馭痛三牲之養忽至  
於遺奠悲萬壽之祝俄成於晞露警咳如在聲容不返畢銅史之  
餘滴動金商之清挽暑令忽其成淒薰風颯其變慘像設旣嚴物  
儀具有惟是冊書用傳不朽官臣承詔式虔事守紀漸寓哀貽之  
永久其詞曰

我宋隆康恩漸動植遠惟暨邇生成滋息趨走賢智修官懋職遐  
及四裔左衽重譯維相向公梁棟宗祏逮女曾孫禎家瑞國蚤歸  
王藩旋被褕翟至性温温令儀翼翼道意禮學生知自得慶壽寶  
慈問安昕夕執養寒暑端莊不易內輔神宗贊助陪益凡厥見聞  
舒徐啟迪十有九年晏粲椒掖萬邦託慈六宮仰式約省外氏湯  
沐脂澤斯世丕平陰與多績比懿夏商塗山簡狄姜嫄太姒聯袂

並易元符三祀歲執徐直正月己卯變同割書巍巍哲宗武威文  
德天何弗祐忽遘寇宓上嗣考廟將決大策于時弼臣或藏邪慝  
輒進異論欲倒白黑賴我聖母沈潛剛克折之陛前氣殫語塞庭  
羅犀渠門屯關戟德見利人寰宇慶懌一指顧閒長寧社稷譬如  
媧皇神功妙力鍊石補天斷鼉立極冲融宇宙滉漾滌滌靡賢不  
登靡寬不釋臣嘗侍對與聞訓敕曰我皇帝聖材天錫子道勤志  
政事祇惕治本亂原講磨紬繹惠心溥博物理研覈帝堪多難子  
復明辟何俟耐饗始還禁閩幸濟初艱後罔餘責重下教告亟就  
安適帝拔以留懇款篋積數請弗回推璽郤籍義盡今茲事高往  
昔在漢馬鄧固多慚色其於邦民憂不離臆動履仁儉示先壺則  
服無珠璣器無瑤碧禁戒雕繪棄捐組織言祖經墳智該儒墨諸  
書過眼疑微洞析兢兢瞿瞿殆忘寢食涼暄密移疹氣侵蝕皇帝  
聖孝啟處在側藥審刀圭術窮鍼石禴禴山川猶期千億丹劑雖  
靈冥算終厄佛供晝昏喪氛夜赤祲象告凶軒星示坼數圯坤元

景淪望魄五十八載馳光度隙嗚呼哀哉梓匠奏工嬪娥罷飾帳  
殿光途殯堂撤席縞士鼎鼎絳旌奕奕左背城闕右徑阡陌殼騎  
趁趨綿車咿噫簫笳悲吟鹵簿哆赫萬類奪輝四民聚戚御服直  
麻皇情樂棘嗚呼哀哉霧雨故宮莓苔舊城鳳幌蕭森獸扉虛寂  
輦路鑑奩孰非陳迹引望山園涕濡竹柏惟有徽音長留寶冊嗚  
呼哀哉

宋文鑑卷第三十二

宋文鑑卷第三十三

御札

大慶殿恭謝御札

歐陽修

熙寧元年南郊御札

王珪

熙寧四年大饗明堂御札

元絳

批答

賜除宰臣文彥博讓恩命批答

歐陽修

賜新除宰臣富弼讓恩命不允批答

歐陽修

賜宰臣富弼乞退不允批答

歐陽修

再賜宰臣富弼乞退不允批答

歐陽修

賜宰臣富弼乞解機務不允批答

歐陽修

賜宰臣文彥博乞解重任不允批答

歐陽修

賜樞密使宋庠讓恩命不允批答

歐陽修

賜杜衍讓恩命不允批答

宋祁

賜賈昌朝讓恩命不允批答

宋 祁

再賜杜衍讓恩命不允批答

宋 祁

賜陳執中韓琦讓恩命不允批答

宋 祁

賜皇弟允迪讓恩命不允批答

宋 祁

賜皇長子淮陽郡王免恩命不允批答

王 珪

賜皇伯祖承亮改封秦國公免恩命不允批答

王 珪

賜宰臣韓琦已下乞立壽聖節宜允批答

王 珪

賜宰臣韓琦已下尊號不允批答

王 珪

賜韓琦免恩命不允批答

王 珪

賜宰臣曾公亮免恩命不允批答

王 珪

賜韓琦免明堂恩命不允批答

王 珪

賜郝質免恩命不允批答

王 珪

賜宰臣富弼乞退不允批答

王 珪

賜歐陽修乞退不允批答

王 珪

賜宰臣韓絳免恩命不允批答

元 絳

賜宰臣韓絳已下上尊號不允批答

元 絳

賜皇伯宗諤免恩命不允批答

元 絳

賜陳升之免恩命不允批答

元 絳

賜宰臣王安石已下乞御正殿復常膳不允批答

元 絳

賜劉摯辭免恩命不允批答

蘇 軾

賜太師文彥博乞致仕不允批答

蘇 軾

再賜太師文彥博乞致仕不允批答

蘇 軾

賜宰臣呂公著乞外任不允批答

蘇 軾

賜宰臣呂公著乞致仕不允批答

蘇 軾

賜司空呂公著免恩命不允批答

蘇 軾

賜右僕射范純仁免恩命不允批答

蘇 軾



賜門下侍郎孫固乞致仕不許批答

蘇軾

御札

賜劉昌祚免恩命不許批答

蘇軾

大慶殿恭謝御札

歐陽修

敕內外文武臣寮等執珪璧以事神嚴祖宗以配帝雖有國之常典亦因時而制宜朕承三聖之丕基撫萬邦之有眾儉于己使天下之民豐勞于心致天下之民佚罔敢怠忽庶幾治平而首春以來偶爽調適賴三靈敷祐百福來臻順以節宣獲茲康裕加以邊隅不聳風雨以時雖庶物之咸和顧眇躬而增惕是用稽先朝之成憲詢故實於有司即廣殿之翼嚴擇靈辰之良吉式伸昭謝以格純休宜示先期俾茲誕告朕取今年九月內於大慶殿行恭謝之禮其今年冬至親祀南郊即宜權罷所有合行諸般恩賞並待就恭謝禮畢一依南郊例施行至日朕親御宣德門宣制仍令所司詳定儀注以間務遵典禮勿俾煩勞咨爾多方咸體予意故茲

札示想宜知悉

熙寧元年南郊御札

王珪

有天下者莫重上神之報為人子者莫嚴宗廟之承率躬三歲之祠常候一陽之應緬慕先聖光施冲人載循禋類之期適在諒陰之際大懼不能備飭儀物奉將粢盛於是刺六經之文傳博士之議皆以謂喪有以權而順變祭無以卑而廢尊矧稽參西漢之彝沿用景德之制顧予涼菲賴帝貺臨遂卜天正之辰往修郊見之禮方且進祈茂祉以大芘黎元昭格至精以終圖熙事庶幾能饗其敢憚勤朕以今年十一月十八日有事于南郊咨爾攸司各揚厥職諸道州府不得以進奉為名輒行科率其百司除事神之物並宜一切仍舊外餘應于供奉所須務令澹約以稱朕不忘孝思之義

熙寧四年大饗明堂御札

元絳

敕內外文武臣寮等朕荷二儀之休履四海之富經庶政之至治

秩將禮之彌文欽惟五聖之謨常躬三載之祀自纘隆於大業已  
肆類於圓丘興言總章未詔嘉饗維仁祖之武宜謹於遵修維文  
考之尊宜嚴於陟配况萬寶時林三光仰澄官師協恭方夏底定  
是用稽仍路寢之制涓選肅霜之辰上以哀對天明展昭事之重  
下以敕厲民志示追養之勤特戒先期以孚大號朕取今年季秋  
擇日有事于明堂其今年冬至更不行南郊之禮所有合行諸般  
恩賞並待就祀明堂禮畢一依南郊例施行至日朕親御宣德門  
宣制咨爾攸司各揚厥職諸道州府不得以進奉為名輒行科率  
務循典故無致煩勞

批答

賜除宰臣文彥博讓恩命批答

歐陽修

省表具之朕躬儉約以先人而生民未足憂勤以勵政而百職多  
隳豈布德之不明抑任人之弗至是以齋居正慮先志後占鑿屢  
易以為煩念難知之可慎永惟商周之所記至以夢卜而求賢孰

若用縉紳之公言從中外之人望卿以舊哲比當相予惟字量能  
寬以服人惟純誠故久而益信勳德兼著可以重朝廷忠信不回  
可以臨大事夫謀於其始而既審則果於必用而不疑汝其欽哉  
朕命無易所讓宜不允仍斷來章

賜新除宰臣富弼讓恩命不允批答

歐陽修

卿有憂國愛君之心而忠以忘其已有經邦濟時之學而用未究  
其能夫畜久而積厚則施之不窮慮深而計熟則謀無不獲茲朕  
所以虛心仄席有望於卿也矧卿正直不回庸邪素忌小人所異  
君子所同是以在外十年而左右之譽不及履躬一德而縉紳之  
望愈隆朕內決於心外詢于眾敢謂有得卿其何辭

賜宰臣富弼乞退不允批答

歐陽修

朕眷惟宰輔之司實繫朝廷之重職或非稱勢因易搖比以連年  
厭於屢易戒用人之不審致厥位之靡安故於圖任之初尤極精  
求之意而議者謂卿有天下之譽慶朕得非常之才豈惟斷不惑

於予心固以慰久鬱之人望則朕之用卿者至矣卿之自待者如  
何而方沃嘉猷遽形退讓駭無因而及此曾莫諭於乃誠豈廊廟  
之崇責重者其憂難任而富貴之至位高則其慮易危邪朕嘗歷  
考往昔之人其於進退之際過計而圖全者未必無患忘身而徇  
國者固多令名惟爾之明必知所擇宜少安於職業用深體於倚  
毗

再賜宰臣富弼乞退不允批答

歐陽修

夫知人之明可謂難矣而任賢之術茲豈易哉若乃聽之不聰信  
之不篤施設之方未盡弗極其材遲速之效有時莫能少待則彼  
其任者實亦艱歟卿以純一忠亮之誠蘊宏深遠大之業朕虛已  
以聽推心仰成至於一二之臣是惟同德下逮眾多之論曾靡閒  
然方將甄敘賢愚修明法度務究本根而更治不逮歲月之近功  
期於有成茲乃予意奈何中道而將止夫亦奚託以為辭矧上下  
既交寧有不通之志而君臣相遇豈為易得之時當體余懷勉安

厥位

賜宰臣富弼乞解機務不允批答

歐陽修

夫宰相之事非可以歲月考而一二數也其在朝廷選賢任能而  
各得其職下俾民俗遷善遠罪而不知其然至於法度修紀綱正  
然後相與慎守而安行之以臻于治此朕所以虛心一意日有望  
於卿者也今事有緒而卿辭焉豈朕德之不明將顧時之不可中  
道而止夫何謂哉俾予獲用材不盡之譏而卿涉苟安自便之計  
予所不取卿其勉焉

賜宰臣文彥博乞解重任不允批答

歐陽修

夫知其人之為賢任則勿貳事其君而有道去不可輕此古之臣  
主之明舉措亦慎所以收功於一時而垂法於後世也卿夙有時  
望為予柄臣自復秉於國鈞僅三周於歲序若乃進退賢否誅賞  
罪功每於聽納之間敢忘虛己顧彼縉紳之論曾靡異辭方期有  
成以副予意而乃過形謙損思避台衡豈寡德弗明於用才而不

盡將多言害正致厥位之難安苟異於斯夫何引讓矧卿忠信之節足以叶予之一心材謀之優可以斷予之大事茲所眷注靈煩諭言

賜樞密使宋庠讓恩命不允批答

歐陽修

朕以因時致享克展於孝思已祭受釐大均於慶澤乃眷耆明之哲實予禮貌之臣肅臨事之有容既交神而蒙貺宜推異數以示眷懷雖嘉好謙曷止成命

賜杜衍讓恩命不允批答

宋 祁

比虛右弼以須峻望卿清約忠壯華皓一節出入諷議靡事不為挺然公實見於有政朕志先定成命惟行況萬幾處可百職修理朕所倚辦卿宜知之遽閱讓函猥徇謙概且誕告羣方不容顯辭久曠台路便廢撝遜欽服寵章

賜賈昌朝讓恩命不允批答

宋 祁

卿曩侍經筵已知國器歷守京邑則風績早樹進領邦憲則威名

流聞揚休山立自處中道朕以為履正識敏材任輔佐引與機政參貳台司曾是踰年休有成效觀行則懿俾謀則臧斷自予志冠升樞省誕告百執初無異言猥露奏封深存撝遜况訓諭已熟典命難淹速即欽膺以光朝舉

再賜杜衍讓恩命不允批答

宋 祁

向以戎醜尙桀師伍留屯公私之匱不可貲省又官濫於外吏欺於中苛察過當爭競成俗濟水無益治絲愈棼圖所振整未知厥序以卿久在樞禁習總事經年耆識茂盡悴事國是用選自予志對秉台衡藉敏材以康調發之難衰介節以懲進取之弊朕既寡德方茲仰成尺奏薦聞能讓猶固已嘗批喻宜體眷求毋煩費詞早膺寵典

賜陳執中韓琦讓恩命不允批答

宋 祁

朕比執珪幣祇事神祇至誠所向鴻釐如答是以推衍天祚沛流茂恩徧錄侍祠之勞悉從進律之典卿卓有成效協於僉言而臨

榮引讓稽恩未拜閱露章而既熟非公論之所期便可欽膺卽廢謙執

賜皇弟允迪讓恩命不允批答

宋 祁

朕敦睦懿親差次寵典年長者崇爵屬近者尚恩眷爾忠賢用加節制公言期協朝渙既頒何執常謙欲遂素守道風雖亮允令難稽往哉惟諧毋或煩請

賜皇長子淮陽郡王免恩命不允批答

王 珪

昔我祖宗誕受天命厥惟艱哉克正皇猷丕懋乃績以遺我子孫無疆之休今朕纂厥服惟稽古建爾元子于有邦乃季秋辛亥羣公庶尹罔不祇朕言于廷爾乃陳德弗及期昇于一二弟兄之賢我聞曰立愛惟親立敬惟長其敢示天下以私虐汝惟往哉尚迪時命無違

賜皇伯祖承亮改封秦國公免恩命不允批答

王 珪

夫戚藩之建王室是毗古者皆世襲其封近代或別予之邑既非祖烈之服又失廟祠之傳故朕推近屬之長賢修先王之舊履以大子孫不絕之序以均宗社無窮之休適覽露章過形冲節宜體親親之意庸光繼繼之圖

賜宰臣韓琦已下乞立壽聖節宜允批答

王 珪

赤制告圖肇承題序青煒動陸俯協誕期卿等過稽舊章列上芳牘緣華封之素祝建壽聖之嘉名竊惟受天元符撫國休運百辟稱觴而在席四夷奉幣而在廷敢以菲懷抑于輿望

賜宰臣韓琦已下尊號不允批答

王 珪

朕獲承大統三載于茲蒙天之休海內清靜方將飭齊輅潔純犧以祇見天地宗廟之靈乃敢昭發丕冊揚徽垂鴻以自施虐尊榮者哉不圖執事之臣列上表功之號且臨政之日淺未有盛烈之章況事神之意恭豈在彌文之飾適增于媿難徇所陳

賜宰臣韓琦免恩命不允批答

王珪

夫王者壹天下之俗宰相遂萬物之宜故君臣同德而教化成朝廷上賢則分職治肆朕承邦之久得卿共政之均且國用失浮規節財力之匪易吏塗過冗甄序名品之為難歷勤勞之百為蹈夷險之一致向屬冢卿之缺適登台席之元稽卜神謀孚言朝聽維百辟之是式維兆民之是瞻奚與曲讓之辭殊匪大公之舉慊然眾志鬱于予聞蓋德盛而位隆者望雖與歸然任劇而責至則事當隨決思體睠毗之異祈收撫固之情往代天工毋留邦渙

賜宰臣曾公亮免恩命不允批答

王珪

夫天文中階之象色正則二氣鈞國柄三事之司體公則萬化緝朕何嘗不寤寐邦傑彌綸政機以敦美風俗之源以甄序官師之品所繫甚大維材之難卿行足以厲朝謀足以經國代言二禁而號令鼓舞羣動賦政中畿而神明炤于宿姦頃陪議於宰臣旋冠謨於宥省邦之維度靡不舉兵之紀律靡不張屬上台之進賢宜

賜韓琦免明堂恩命不允批答

王珪

右弼之膺寵忽起舜庭之讓未施鄧國之規羣情鬱然予心勞止矧夫付安危之幾則望豈云淺當名器之分則處之勿疑所期廣猷慮以同寅會精神而輔力當抑謙風之固往調大化之元豈朕之獨致太平亦卿之與有令聞

賜郝質免恩命不允批答

王珪

予臨路寢之上曾覽八紘邈然有通神明之志迺季秋宗祈既右上帝亦右文考始予齋精臨獻而懼不勝及觀夫簠樽在堂鍾石在庭至陟降上下之數與夫九州四海美物之薦罔不具飭噫何其禮之盛歟非爾元宰之臣孰總裁劑之故已降之制為百辟先亦皇天降休命于我家非予之所敢專也今書固辭顧不廢予惠術之施序

必異其寵御眾者必予之權毋為過兢其服重委

賜宰臣富弼乞退不允批答

王珪

朕肇履邦圖每恭天戒屬初災之在序偶時澤之弗滋且止于近畿顧民災之未遠然應不旋日知人事之已修卿還來相予居位未久奚抗章而引咎將援故而辭權雖蹈夫聖賢遠覽之思殆戾於君臣交儆之意勉規弗及終底于成

賜歐陽修乞退不允批答

王珪

夫與政之途蓋天下之責至者叢矣顧雖智勇不能以禦流訾之來前日御史加非於卿朕惟其辭甚悖於義理之文今讒者放而疑者釋卿猶欲以去位豈朕所望焉傳不云乎禮義不愆何恤人之言其起眎事毋重朕之不敏也

賜宰臣韓絳免恩命不允批答

元絳

卿方重瀆深清明端亮閱文武之二枋擴謀猷於百為屬者羌種跳邊王師淹戍往視方略以宣威靈嘉維爾忠蔽自朕志絕軼前

代比登冢司扶世澤民將倚調於元化靖兵戡亂猶佇建於膚公況惟渙號之孚已穆廣朝之聽胡為懇牘欲避隆名雖難進之風自高沖尚而仰成之屬殊弗顧懷起宜欽承毋重撝固

賜宰臣韓絳已下上尊號不允批答

元絳

朕聞唐虞之世君臣吁俞相與敕戒以康庶事未聞其自耀功德大為名稱以動天下之聽朕以涼菲獲承皇緒固已極崇高之位號矣嚮者奉郊宗之祀三事大夫亦屢以徽冊來上而愧不敢從方且嘉與眾賢夙寤晨興以營極治之業要之萬世建無窮之基亦有無窮之聞不猶愈於虛名歟臣之尊君義則勤至朕守弗奪毋煩數陳

賜皇伯宗諤免恩命不允批答

元絳

卿爵齒兼尊德名參劭佑予郊廟之事克有夙夜之勤疇勞策勳時乃舊典往承成命無用勤辭

賜陳升之免恩命不允批答

元絳

卿久服樞筦協成王功屢陳誠辭願解幾政方建將旄之重寄且增台路之華流輔成萬微嘗宣左右之力兼賦二枋宜旌文武之謨卽當欽承安用冲挹

賜宰臣王安石已下乞御正殿復常膳不允批答

元絳

垂象之變咎在朕躬內惟菲涼敢不祗懼避朝損膳欽天之渝神休震動銷去大異而三事庶尹咸造在庭願復舊常至于再請且星隆曷德猶賴交修況天畏棊忱固當屢省弭裁嚮福其庶幾焉

賜劉摯辭免恩命不允批答

蘇軾

政如農耕以旣穫爲能事言如藥石以愈疾爲成功若耕不穫疾不愈朕何望焉所以用卿者非以富貴卿也勉卒成業何以辭爲

賜太師文彥博乞致仕不允批答

蘇軾

卿出入四世師表萬民無羨於功名而有厭於富貴其所以忘身徇國捨逸就勞者豈有求而然哉凡以先帝之恩生民之欲也卿

之在朝如玉在山如珠在淵光景不陳而草木自遂去就之際損益非輕昔西伯善養老而太公自致魯穆公無人子思之側而長者去之卿自爲謀則善矣獨不爲朝廷惜乎藥餌有閒時遊廟堂家居之樂何以異此

再賜太師文彥博乞致仕不允批答

蘇軾

朕修身以承六聖虛己以聽四輔而法度未定陰陽未和民未樂生吏未稱職中夜以思方食而歎雖不敢以事諉元老實望其以身率百官卿猶未卽於安孰敢不盡其力此聖母冲人之本意而天下有識之所望也昔唐太宗以干戈之事尙能起李靖於旣老而穆宗文宗以燕安之際不能用裴度於未病治亂之效於斯可見朕意如此卿其少安

賜宰臣呂公著乞外任不允批答

蘇軾

夫以才御物才有盡而物無窮以道應物道無窮而物有盡凡今之患所乏非才以卿篤於愛君必能建長久之策澹然無我可以



寄枉直之權二年于茲百度惟正事既就緒民亦小康至於微疾之屢攻亦高年之常理卿其良食自輔爲國少安譬如止水之在盤豈復勞心於鑿物心且不勞而況於力乎

賜宰相不自用人主不自爲予欲識人物之忠邪故以卿爲水鏡予

欲知利害之輕重故以卿爲權衡苟明此心雖老猶壯與其輕去軒冕獨善其身孰若優游廟堂兼享其樂益敦此義勿復有云

賜司空呂公著免恩命不允批答

夫國以得人爲彊如猛獸之衛藜藿以積賢爲寶如珠玉之茂山川湛然無爲物自蒙利故崔公發議則淄青慙服知朝廷之有人蜀使抗詞則孫權回顧歎張昭之不在得失之效豈可同日而語哉朕之用卿意實在此國計之重可無復辭

賜右僕射范純仁免恩命不允批答

自昔先帝之世屢歎材難及朕嗣位以來專用德選雖爵祿名器

出於獨斷而長育成就實在羣公長短不遺輔相之責苟無爲國養人之意必有臨事乏使之憂朕用慨然當食不御思得英雋之老共收文武之用惟卿篤於憂國明於知人灼見朕心宜在此位往任天下之重毋事匹夫之廉

賜門下侍郎孫固乞致仕不許批答

吾不出帷幄臨御家邦實賴股肱之良以持綱紀之要於其進退顧可輕聽之哉卿頃自近藩擢貳東省本以年德之故非有筋力之求若夫正顏色出詞氣使人望之而忠誠可信鄙倍自遠斯可矣豈以一病未能造朝遂欲舍而去哉誠請雖勤於義未也

賜劉昌祚免恩命不許批答

卿國之虎臣帥我爪士總章大祀宿衛有勞宜爲六軍之先以承大賚之慶辭而不有殊匪吾心



六